

Luka

JANDIKO: Luka

KAR NDIKO: Rumi

KINDE NDIKO: 60 E YIK RUOTH (AD)

Gik Manie Iye

Luka ne en jathieth kendo ne en jawuodh jaote Paulo. Injili mare ne ondikone Ja-Yunani molony miluongoni Theofila 1:3, kanyise, kit Yesu mar dhano kod ngimane kaka obet. Mae nomiyo Luka notang' kuom weche duto mane ondiko konyiso adimba tarik gi odiechieng' mane gimoro ka gimoro timoree, ochako gi nyuol Yesu kod bikira Maria, konyise nyaka weche mamoko maok ondiki kamoro amora. Ondiko kuom tij Yesu e dala mar Galili, bang'e opuonjo marabora kuom wuoth mane Yesu odhigo Jerusalem. Bang' tho Yesu gi chierne, jopuonjre odong' ka gin kod ilo ka girito teko mar Nyasaye ma ae polo mondo opong'gi.

THORRO

Kaka Mathayo nyiso ni Yesu en Mesia mar Jo-Yahudi, Mariko to nyiso ni Yesu en Jatich mar Nyasaye. Luka to nyiso ni Yesu en Nyasaye Maler kendo en dhano moa kuom koth Adam 3:23-38. Yesu en jal mosetimo gik moko madongo e ndalo mar ngimane, moloyo ng'ato ang'ata e piny. En dhano maduong' moloyo ng'ato ang'ata kaluwore gi puonjne, gik mane otimo, gimane omiyo otho kaachiel gi chier aa kuom joma otho. Magi duto ema omiyo nyaka wayie kuome ni en Ruoth.

WECHE MOCHAN KAE GIN.

1. Nyuol gi ndalone mane en rawera 1:1-2:52.
2. Batiso mar Yesu kod tem 3:1-4:13
3. Tij Yesu ei Galili 4:14 - 9:50
4. Wuodh Yesu Jerusalem 9:51-19:27
5. Tij Yesu ei Jerusalem 19:28-20:47
6. Kor kuom gik mabiro 21:1-38.
7. Tho Yesu, gi chieme 22:1-24:53

Wach Motelo

1 Ji mang'eny osebedo ka chano weche mane otimore e dierwa, ²Mana kaka nochiwgi ne wan kod jogo motelo mane joneno wang'giwang kendo jotich wach. ³Kuom mano, an bende kaka asenono tiend wehegi malong'o nyaka a chakruok, en gimaber bende mondo andik ni e yo mochanore maler, in mulour Theofilo. ⁴Mondo ing'e adier mar gik mose pwonji.

Nyuol Johana Jabatiso Onyis Motelo

⁵E ndalo ma Herode ruodh Judea, ne nitie jadolo ma nyinge Zakaria, ma ne en achiel kuom oganda jodolo mag Abija; chiege Elizabeth bende ne nyar dhood Harun. ⁶Gi duto jariyo ne gin joma kare nyim Nyasaye, ne girito chike madongo gi matindo mag Ruoth Nyasaye, maonge ketho. ⁷To ne gi onge gi nyithindo, nikech Elizabeth ne migumba, kendo gin jariyo-gi hikgi: nose niang'

⁸Chieng' moro kane oganda gi Zakaria ne ni e tich to notiyo kaka jadolo e nyim Nyasaye, ⁹Noyiere gi ombulu kaka chik mar jodolo, mondo odonji ei hekalu mar Ruoth kendo owang ubani. ¹⁰To ka sa mar wang'o ubani ochopo, jolemo duto nochokore oko kendo negilamo.

¹¹Eka malaika mar Ruoth Nyasaye nofwenyorene, kochungo bath kendo mar ubani korachwich. ¹²Kane Zakaria onene, ne obwok kendo luoro nomake. ¹³To malaika nowachone ni kik ibed maluor, Zakaria; lamoni osewinji chiegi Elizabeth biro nyuoloni wuowi, kendo inichake Johana. ¹⁴Obiro bedo ni mor kod ilo, to ji mang'eny nomor nikech nyuolne, ¹⁵Nimar enobed ng'at maduong' enyim Ruoth. Ok nomadh kong'o kata math moro makech, to enopong'gi Roho maler chakre nynolne. ¹⁶Obiro kelo jo Israel mang'eny ir Ruoth Nyasachgi. ¹⁷Kendo notel nyim Ruoth, gi chuny kod teko mar Elijah, koduogo chunje wuone ir nyithindgi, kendo koloko joma wigi tek mondo oluw rieko mar ji makare- loiko oganda mowinjore ni Ruoth.

¹⁸Zakaria nopenjo malaika niya, " Ere kaka" dang'e "ni wachni en adier? An ng'at moti kendo chiega bende hike oni-ang'."

¹⁹Malaika nodwoko ni, "An Gabriel, achungo e nyim Nyasaye, kendo oseora mondo awuo kod kendo nyisi wach maberni. ²⁰To koro ibiro bedo bemo kendo ok iniwinj nyaka ndalo ma gini notimre, nikech ne ok iyie wechena, mabiro bedo adiera e kindegi mowinjore.

²¹E kindeno, ji nerito Zakaria kendo negiwuoro ni ang'o momiyi osebedo aming'a ei Hekalu. ²²Kane owuok oko, ne ok nyal wuoyo kodgi. Nening'eyo ni nose- neno fweny ei Hekalu, nimar nosiko konyisogi gik moko gi lwete to neok onyal wuoyo.

²³Ka kindene mar tich norumo, nodok dala. ²⁴Bang' mani chiege Elizabeth nomako ich to kuom dweche abich neok owuok oko. ²⁵Nowacho ni " Ruoth

Nyasaye osetimona ma," E ndalogi osenyiso ng'wonone kuoma kendo ogolana wichkuot e kind ji."

Nyuol Yesu Onyis Motelo.

²⁶E dwe mar auchiel, Nyasaye nooro malaika Gabriel odhi Nazareth, taon manie Galili. ²⁷Ir nyako moro mane pok ong'eyo dichwo, mane osesingore mondo okende gi ng'ato ma nyinge Josef ma nyakwar Daudi. Nying nyakono mapok ong'eyo dichuo ne en Mariam. ²⁸Malaika nodhiyo ire momoseni "Amosi, in jal mokechi moloyo! Ruoth ni kodi."

²⁹Wechego nochando chuny Mariam ahinya, to nowuoro mos mane omosegono, ni tiende ang'o. ³⁰To malaika nowachone ni " Kik iluor Mariam, nikech Nyasaye osetimoni ng'wono. ³¹Ibiro bedo gi nyathi kendo ininyuol wuowi, to inimiye nying ni Yesu. ³²Obiro bedo maduong' kendo noluonge Wuod Ngat Mamalo Moloyo, Ruoth Nyasaye biro miye kom loch mar kwar mare, Daudi. ³³To enobed gi loch kuom od Jakobo nyakachieng' lochne ok anarum ngang'."

³⁴Mariam nopenjo malaika ni; " Mani biro bedo nadi," "to pod an nyako mapok ong'eyo dichwo?"

³⁵Malaika nodwokoni, " Roho Maler biro, biro kuomi, kendo teko mar Ng'at ma malo moloyo biro umoi. Kuom mano jal maler monego nyuol ibiro luongo ni Wuod Nyasaye. ³⁶Bende ng'eni Elizabeth ma watni biro bedo gi nyathi e hike moni-ang, to jalo mane iluongo ni migumba no, koro en gi ich mar dweche auchiel. ³⁷Nimar onge gima nyalo tamo Nyasaye."

³⁸Mariam nodwoko ni, " An jatich Ruoth, onego timre kaka iwacho." Eka malaika noweye.

Mariam Olimo Elizabeth.

³⁹E kindeno Mariam noikore mowuok mapiyo kodhi e piny motimo gode mar Judea, ⁴⁰Kama nodonjo e dala Zakaria kendo nomoso Elizabeth. ⁴¹Ka Elizabeth nowinjo mos mar Mariam nyathi notugo

e iye kendo Elizabeth nopongi' Roho Maler. ⁴²Gi duol maduong nomor kowachoni, " In jal moguedhi kuom mon, kendo oguedhi nyathi ma ibiro nyuolo! ⁴³To ango momiyo obed manguon koda; momiyo min Ruodha dibi ira? ⁴⁴Piyo piyo nono ka mosni ochopo e ita, nyathi manie iya notugo gi mor. ⁴⁵Oguedhi jal no moseyie ni gima Ruoth osewachone ibiro timo."

Wende Mariam

⁴⁶To Mariam nowacho niya,
"chunya opako Ruoth

⁴⁷Kendo chunya oil kuom Nyasaye Jawarna,

⁴⁸Nimar osepapo dhier mar jatichne chakre kawuounoni tienge duto biro luonga ni mogwedhi.

⁴⁹Nimar Jal Maratego osetimona gik madongo Nyinge ler.

⁵⁰kechne, chopo kuom jogo moluore a tieng' ka tieng'.

⁵¹Osetimo timbe madongo gi bade, okeyo jogo masungore e parogi maiye.

⁵²Osegolo ruodhi e kombegi to oseting' o malo jomamuol

⁵³Oseyiengo jokech gi gik mabeyo to oseriembo jomwandu gi lwetgi nono.

⁵⁴Osekonyo jatichne Israel, koparo bedo mang'won.

⁵⁵Ne Abraham kod nyikwaye nyakachieng', mana kaka nowacho ni kwerewa."

⁵⁶Mariam nobet gi Elizabeth kuom dweche madirom adek to eka nodok thur-gi.

Nyuol Mar Johana Jaabatiso

⁵⁷Kane en kinde mane Elizabeth onego yudie nyathi, nonyuolo nyathi ma wuowi.

⁵⁸Jogweng' kod wedene nowinjo ni Ruoth Nyasaye osetimone kech maduong' mi gimor kode.

⁵⁹Chieng' mar aboro negibiro mondo gi ter nyathi nyangu kendo ne gidwaro chake nying wuon-gi Zakaria, ⁶⁰to min-gi

nowuoyo kendo wacho ni, "Ooyo! Ibiro luonge ni Johana."

⁶¹Ne giwachone ni, " Onge ng'ato moro kuom wedeni man-gi nyingni."

⁶²Eka ne giwuoyo gi woun mare gi lwetgi, mondo giyud ni en nying mane madoher luong nyathi. ⁶³Nokwayo bao mar ndiko kendo ji duto nowuoro ka nondiko ni, "Nyinge en Johana." ⁶⁴Gikanyono dhoge noyawore kendo lewe nogonyore, to nochako wuoyo, kopako Nyasaye. ⁶⁵Luoro nomako jogweng' duto, kendo ji duto manie piny gode Judea ne loso kuom gigi duto. ⁶⁶Ng'ato ka ng'ato manowinjo mani newuoro mani, kapenjo ni, "Nyathini biro bedo machal nadi?" Nimar lwet Ruoth ne ni kode.

Wend Zakaria

⁶⁷Wuon mare Zakaria nopong' gi Roho Maler kendo nokoro wach kama:

⁶⁸Pak obed ni Ruoth Nyasach Isarel; nikech osebiro kendo osereso joge.

⁶⁹Osechungonwa tung' mar warruok marwa, e od jatichne Daudi.

⁷⁰(kaka nowacho gi dho jonabige maler mag ndalo machon).

⁷¹Warruok ae lwet wasikwa, kendo ae lwet jogo duto mamon kodwa-

⁷²onyis kech ni kwerewa, kendo opar singruokne maler,

⁷³singruok mane okwong'orego ni kwarwa Ibrahim:

⁷⁴mondo oreswa e lwet wasikwa kendo miyo watine maonge luoro,

⁷⁵e ler kod tim makare e nyime ndalowa duto.

⁷⁶To in, nyathina, ibiro luongi ni janabi mar Ng'at Man Malo Moyo, nimar ibiro telo nyim Ruoth mondo iik ne yo,

⁷⁷kendo imi joge ng'eyo mar warruok kuom weruok mar richogi,

⁷⁸nikech ng'wono mamuol mar Nyasachwa, ma chieng' mawuok biro go irwa koa e polo.

⁷⁹mondo orieny kuom jogo modake mudho, kendo nie tipo mar tho, mondo

otel ni tiendwa e yor kuwe."

⁸⁰To nyathi nodongo kendo nobedo motegno e chuny; to nodak e thim nyaka nonyisore ratiro e nyim Israel.

Nyuol Mar Yesu

2E ndalogo, Kaisar Augusto nogolo chik mondo okwan ji e piny Rumi duto. ²Ma ne en kweno mokwongo mano timore ka Kwirinio ne en ruodh Siria. ³To ng'ato ka ng'ato nodhi e taondgi owuon mondo ondik nyinge.

⁴Kuom mano, Josef bende noa taon mar Nazareth, Galili modhiyo Judea nyaka Bethlehem taon mar Daudi, nikech ne en achiel kuom joodgi kendo anyuola gi Daudi. ⁵Nodhiyo kuno mondo okwane kod Mariam, mane osingore mondo okendi, kendo nogeno yudo nyathi. ⁶Kane gin kuno, kinde mar nyuolo nyathi nochopo, ⁷to nonyuolo nyathine makayo, ma wuowi. Ne oboye gi nanga kendo nokete e sanduk mar chiemb dhok, nikech neonge od welo.

Jokwadh Rombe Kod Malaika

⁸To ne nitie jokwadh rombe manodak oko e lek machiegini kanyo, kagirito jambgi gotieno. ⁹Malaika mar Ruoth nobiro irgi kendo duong' mar Ruoth Nyasaye norieny, molworogi, mi negi luor. ¹⁰To malaika nowachonigi niya "Kik uluor. Akelonu wach maber mar ilo maduong' mabiro bedo niji duto. ¹¹Kawuononi e taon mar Daudi, Jawar osenyuolnu; en Kristo Ruoth. ¹²Mani nobednu ranyisi: Ubiro yudo nyathi ma obo gi nengni ka onindo ei sanduk mar chiemb dhok.

¹³Apoya nono oganda maduong' mar jopolo nothinoyore kod malaika kagipako Nyasaye kendo wachoni,

¹⁴Duong' ni Nyasaye man e polo kendo e piny, kuwe ni ji ma ng'-wonone ni kuom gi."

¹⁵Kane malaika noseweyo jogi kendo dhiyo e polo jokwath nowacho kendgi ni,

wadhuru Bethlehem mondo wane gima osetimore, ma Ruoth osenyisowa kuome ni."

¹⁶Kuom mano ne gidhiyo mapiyo kendo negiyudo Mariam gi Josef kod nyathi konindo e sanduk mar chiemb dhok. ¹⁷Kane gisenene, negilando wach mar gima ne owachnigi kuom nyathini, ¹⁸Kendo ji duto manowinjo wachni, nowuoro gima jokwath nowachonigi. ¹⁹To Mariam nokano gigi duto kendo parogi e chunye. ²⁰Jokwath nodok, kagi pako Nyasaye kendo miyo Nyasaye duong' kuom gik moko duto manegisewinjo kendo neno, mane obed mana kaka nosenyisgi.

Oter Yesu E Hekalu

²¹Chieng' ndalo mar aboro kane kinde monego otere nyangu ochopo nomiye nying ni Yesu, nyingno mane malaika osemiye kapok omak ichne.

²²Kane kinde ochopo ma pwodhruok kaka Chik mar Musa nochopo, Josef gi Mairam notere Jerusalem mondo gichiwe ni Ruoth. ²³Mana kaka ondiki e chik mar Ruoth ni, "Nyathi ka nyathi makayo mawuowi nyaka wal ni Ruoth." ²⁴Kendo kitimo misango koluware gi gima owachi e Chik mar Ruoth ni mondo ochiw: akuche ariyo kod akuche odugla matindo ariyo." ²⁵E kindeno ne nitiere ng'ato Jerusalem miluongo ni Simeon, ne en ng'at makare kendo moluoro Nyasaye, norito loch mar Israel, kendo Roho Maler neni kuome.

²⁶Nosefwenyene gi Roho Maler ni ok obi tho kapok oneno Kristo mar Ruoth. ²⁷Kotere gi Roho, nodhiyo ei agolni mag Hekalu. Kane jonyuol okelo nyathi, Yesu, mondo otimne gino ma Chik dwaro, ²⁸Simeon nokawe moriwe e bade kendo nopako Nyasaye, kowicho niya:

²⁹"Ruoth majaloch, kaka ne isesingo, koromi igony misumbani gi kuwe,

³⁰Nimar wengena oseneno warruokni,

³¹miseiko e nyim ji duto,

³²ler mar fweny ni Ogendini ma ok jo

Yahudi, to mar duong' ni jogi Israel.

³³Wuon gi min nyathi nowuoro kuom gima ne owach kuome. ³⁴Eka Simeon noguedhogi kendo nowacho ni Miriam, min mare niya; "Nyathini oketi mondo okel podho gi chung' mar ji mang'eny e Israel, kendo obed ranyisi mibiro wuoyo kuome kikwedo. ³⁵Kuom mano paro mag chunje mang'eny ibiro fwenyo. To lig-angla biro chuoyo chunyi in iwuon bende." ³⁶Ne nitie janabi madhako bende, Ana, nyar Fanuel ma ja-dhood Asher. Ne oti ahinya bende noyudo osedak gi chuore higini abiriyo bang' kendne,

³⁷Eka nobedo chi liel nyaka koro ne en jahigni piero aboro gang'wen. Ne ok oa e Hekalu to nolemo otieno gi odiechieng', koriyo kech kendo olamo. ³⁸Kobiro irgi gie kindeno, nogoyo erokamano ni Nyasaye kendo nowuoyo kuom nyathi ni ji duto mane ogeno kuom resruok mar Jerusalem.

³⁹Kane Josef gi Mariam josetimo duto manedwarore koluware gi chik mar Ruoth, negidok Galili e taon margi Nazareth. ⁴⁰To nyathi nodongo kendo nobedo motegno; nopong' kod rieko, kendo ng'wono mar Nyasaye ne ni kuome

Wuowi Yesu Ni E Hekalu

⁴¹Higa ka higa jonyuolne nedhiyo Jerusalem e Sawo mar Pasaka. ⁴²Kane en jahigini apar gariyo, negidhiyo e Sawono koluware kod timgi. ⁴³Bang' ka sawono norumo, ka jonyuolne nedok dala, wuowi Yesu nodong' chien e Jerusalem, to neok ging'eyo mani. ⁴⁴Kagiparo ni ne en ei oganda margi, negiwuotho moromo ndalo achiel eka negichako manye e dier wedegi kod osiepe. ⁴⁵Kane ok giyude, negidok Jerusalem mondo gimanye. ⁴⁶Bang' ndalo adek negiyude ei agolni mag hekalu, kobedo e kind jopunj, kowinjogi kendo penjogi penjo. ⁴⁷Ng'ato ka ng'ato manowinje nowuoro ng'eyone kod dwokoge. ⁴⁸Kane jonyuolne nonene, negi hum. Min mare nowachone ni, "Wuowi, ang'o momiyo isetimonwa kamani?"

Wuonu kod an wasedwaroi gi luoro."

⁴⁹Nopenjogi ni, "Ang'o momiyo neu-manyanya?" "Ok ung'eyo ni onego abed e od wuora?" ⁵⁰To neok ging'eyo gima ne owachonigi.

⁵¹Eka nodhiyo nyaka Nazareth kodgi kendo nomiyogi luor kowinjogi. To min mare nokano gigi duto e chunye. ⁵²To Yesu nodongo gi rieko kod medruok e ringruok, kendo e ng'wono gi Nyasaye kod ji.

Johana Jabatiso Loso Yo

3 E higa mar apar ga abich mar loch Kaiser Teberio- kane Pontias ne jaloch mar Judea, Herode ruodh Galili, mowadgi Filipino ruodh Iturea gi mar pinje mag Trakoniti, to Lusania ne ruodh Abilene, ²E kinde ma dolo maduong' ma Anas gi Kaifa wach Nyasaye ne obiro ni Johana woud Zakaria e thim. ³Nodhiyo e piny duto moloro Jordan, noyalo batiso mar lokruok mar weyruok mar richo. ⁴Kaka nondiki e kitabu mar weche mag Isaya janabi ni:

"Duol mar nga'to kok e thim kowachoch, 'Ikuru yor Ruoth, rieururu tir yorege. ⁵Hoho ka hoho nobugi mapong', gode modongo gi matindo nodok piny, yore mobam biro bedo moriere, yore motimo go gni nobed mayom ⁶Kendo ji duto biro neno warruok mar Nyasaye."

⁷Yohana nowacho ni oganda mane biro mondo obatisgi ni, "Un nyithind thuonde! Ng'ano mane osiemou mondo uring ua kuom mirima mabiro? ⁸Nyaguru olemo momanyore gi lokruok. To kik uchak uwach kendu uwegi ni, "Wan-gi Ibrahim kaka wuonwa." Nimar awachonu ni kata mana kuom kitegi Nyasaye nyalo loko nyithind Ibrahim. ⁹Le oseketi e tiend yiende, to yien moro amora maak nyag olemo mabeyo ibiro ng'olo igo piny kendo iwito e mach."

¹⁰Oganda nopenje ni, "Kara En ang'o

monego watim?"

¹¹Johana nodwoko ni, "Ng'at man-gi sede ariyo owinjore chiw achiel okonygo nyawadgi ma ongego, kendo jalno man kod chiemo bende onego tim kamano."

¹²Josol osuru bende nobiro ire mondo obatisgi. Negipenjeni, "Japounj. En ang'o mowinjore watim?"

¹³Nonyiso ni, "Kik usol osuru moloyo kaka idwaro ni mondo usol."

¹⁴Eka askeche moko nopenje ni, "To en ang'o mowinjore watim." Nodwokogi ni, "Kik uma ng'ato pesa gi thuo kata donjo ne ji gi miriambo to misara maru muyudo mondo oromu."

¹⁵Ji ne pod rito gi geno ahinya kendo giduto ne giwuoro kagiparo e chunjegi ni nyalo bedo ni Johana e Kristo. ¹⁶Johana nodwokogi duto ni, "An abatisou gi pi. To ng'ato man-gi teko maloya biro biro, ma tond wuohege ok awinjora gonyo. En obiro watouche gi Roho Maler to kod mach. ¹⁷Rapiedhi ne lwete mondo opiedhgo cham duto maler e kar dino cham, kendo ochok cham koketo e deche, to obiro wang'o mihudhi gi mach maok rum."

¹⁸To gi weche moko mang'eny Johana nojiwo ji kendo noyalo wach maber ni ji.

¹⁹To ka Johana nokwero Herode ma ruoth nikeh wach Herodia, ma chi owadgi, kendo kuom gik mamoko maricho mane osetimo, ²⁰Herode nomedo timo gima rachie moloyo kendo nomako Johana kendo tweye e jela.

Batiso Gi Anywola Mar Yesu

²¹Kane ibatiso ji duto, Yesu bende ne obatisi. To ka nolamo, polo noyawore ²²kendo Roho Maler nolor mopiyo kuome machal gi akuru to dwol noa e polo mawacho niya, "In e Wuoda, ma ahero; chunya mor kodi."

²³Koro ka Yesu owuon ne romo kar higni piero adek, eka nochako tichne. Ne iparo nine en wuod Josef,

wuod Eli ²⁴wuod Mathat, wuod Lawi, wuod Melki, wuod Janai, wuod Josef ²⁵wuod Matathia, wuod Amos, wuod

Nahum, wuod Esli, wuod Nagai ²⁶wuod Maath, wuod Matathia, wuod Semein, wuod Josek, wuod Joda, ²⁷Wuod .Janan, wuod Resa, wuod Zerubabel, wuod Shaltiel, wuod Ner, ²⁸wuod Melki, wuod Adi, wuod Kosam, wuod Elmada, wuod Er, ²⁹wuod Joshua, wuod Eliezer, wuod Jorim, wuod Mathat, wuod Lawi. ³⁰Wuod Simeon, wuod Juda, wuod Josef, wuod Jonam, wuod Eliakim, ³¹wuod Melea, wuod Mena, wuod Matatha, wuod Nathan, wuod Daudi. ³²Wuod Jesse, wuod Obel, wuod Boaz, wuod Solmon, wuod Nashon. ³³Wuod Aminadab, wuod Admin, wuod Amir, wuod Hezron, wuod Perez, wuod Juda. ³⁴Wuod .Jakobo, wuod Isaka, wuod Ibrahim, wuod Tera, wuod Nahor, ³⁵wuod Senug, wuod Renu, wuod Peleg, wuod Eber, wuod Shela, ³⁶wuod Kainan, wuod Arfaksad, wuod Shem, wuod Nowa, wuod Lamek, ³⁷wuod Methusela, wuod Enoka, wuod Jared, wuod Mahalalel, wuod Kenan, ³⁸wuod Enos, wuod Seth, wuod Adam, wuod Nyasaye.

Tem Mar Yesu

4 Yesu, kopong' gi Roho Maler, noa Jordan, kendo notelne gi Roho e thim. ²Kuom ndalo piero ang'wen ne ok ochamo gimoro e ndalogo duto, to bang' ndalogo koserumo kech nekaye.

³Satan nowachone ni, "Ka in Wuod Nyasaye, nyis kidini olokre kuon."

⁴Yesu nodwokoni, "Ondiki ni, 'Dhano ok bed mangima nikech kuon kende."

⁵Eka Satan notere kama oting'ore malo kendo ka diemo wang' nono nonyise pinje ruodhi duto mag piny. ⁶To nowachone niya, "Abiro miyi lochgi duto gi duong'gi, nimar osemiyagi, kendo anyalo chiwogi ni ng'ato ang'ata, madwaro. ⁷Emomiyo ka igoyo chongi nyima mailama, magi duto biro bedo magi.

⁸Yesu nodwoke ni, " Ondiki ni, Lam Ruoth Nyasaye kendo en kende ema itine.

⁹Eka satan notere Jerusalem kendo nomiyo ochungo e osuch kama bor malo

mar Hekalu. Eka nowachone ni, "Ka in Wuod Nyasaye, dirri piny kia ka. ¹⁰Nimar ondiki ni,

"Obiro chiko malaikage nikech in mondo oriti maber, ¹¹giniting'i e bedegi, mondo kik ichwany tiendi e kidi,"

¹²Yesu nodvoko ni, " Owachi ni, kik item Ruoth Nyasachi.

¹³Kane Satan osetieko temgi duto, noweye nyaka thuolo moro machielo.

Yesu Okwedi E Nazareth

¹⁴Yesu nodok Galili e teko mar Roho, kendo wachne nolandore e gwenge duto mar piny. ¹⁵Nopujo e sunagokegi, kendo ji duto nopake.

¹⁶Nodhiyo Nazareth kuma nopidhee modongoe, kendo chieng Sabato nodhiyo e sunagogi, kaka nobedo kite kendo nochungo mondo osom. ¹⁷Nomiye kitap Isaya janabi ka oelogo, noyudo kama nondikie ni:

¹⁸"Roho mar Ruoth ni kuoma, nikech osegwira moyiera mondo ayal wach maber ne joma odhier. Oseora mondo aland ni joma otwe ni gin thuolo kendo ni muofni ni oyaw wengegi, mondo ogony jogo misando ¹⁹Kendo lando higanano mar ng'wono mar Ruoth."

²⁰Eka noumo kitabuno, minochiwe ni jatich, kendo nobedo piny wenge ji duto e sunagogi neng'ie matek, ²¹To nochako kowachonigi niya, " kawuono ndikoni chopo kare ka uwinjo."

²²Ji duto nowuoyo maber kuome kendo negiwuoro ahinya weche mag ng'wono manowuok e dhoge. Negipenjo " Mani donge e wuod Josef?"

²³Yesu nowachonigi ni, "Adier chutho ubiro wachona ngero ni in Jathieth, changri iwuon! Tim e dalau ka gigo mawasewinjo ni ne itimo Kapernaum."

²⁴Nodhiyo nyime kowacho, " Awachonu adiera, onge janabi mirwako e dalagi owuon. ²⁵Adier awachonu ni netie

mond liete mang'eny e Isarel e kinde mar Elija, kane polo olor kuom higini adek ginus kendo ne nitie kech mager e piny kuonde duto. ²⁶To kata kamano ne ok oor Elija ir moro kata achiel kuomgi, to makmana chi liel e dala mar Zarefath e gweng' Sidon. ²⁷Bende ne nitie ji mang'eny e Israel manenigi dhoho e kinde mar Elisha janabi to onge kata achiel mane opwodhi mak mana Naaman kende, ja-Siria."

²⁸Ji duto mane nie Sunagogi mirima mager nomakogi kane giwinjo wehegi. ²⁹Ne gia malo minegiriembe gigole oko mar taon kendo tere e geng got kama nogerie taon-no mondo gidhire piny: kathirathira, ³⁰Kata kamano nowuotho awuo tha kokadho e kind oganda kendo odhiyo kuma nodhiyoe.

Yesu Oriembo Jachien Oko

³¹Eka nodhiyo Kapernaum, taon manie Galili, kendo chieng' Sabato nochako puonjo ji. ³²Negiwuoro puonjne, nikech wechene ne nigi teko.

³³To e sunagogi ne nitie ng'ato moro mane nigi jachien. Noywak kogoyo koko matek niya, ³⁴"En ang'o midwaro timo kodwa, Yesu Ja Nazareth? Isebiro mondo itiekwa? Ang'eyo in ng'a, ng'at Maler mar Nyasaye!"

³⁵Yesu nokwere matek niya, " Ling' thi, wuogi ia kuome". Eka jachien nogoyo ng'atmo piny e nyingi duto kendo nowuok maok ohinye.

³⁶To ji duto nowuoro kendo wacho ni ng'ato ka ng'ato ni, "Ma puonj ma nade? Giteko maduong kod loch ochiko chunje maricho kendo gi wuok gi aa. ³⁷To wachne ne olandore e aluora duto kuonde mokiewo gi gweng' mane entie.

Yesu Chango Ji Mang'eny

³⁸Yesu noa e sunagogi kendo nodhiyo e dala Simon. Koro maar Simon netuo tuo mar midhusi matek, kendo negikwayo Yesu mondo okonye. ³⁹Omiyo nodhiyo mokulore bute kendo nochiko midhusi,

mondo oa kendo midhusi noweye. Nochungo mapiyo kendo nochako miyogi chiemo.

⁴⁰Kane chieng' podho, ji nokelo ni Yesu ji duto mane nigi tuoche kido mayoreyore, kendo noketo lwetene kuom moro kamoro, mochangogi. ⁴¹Moloyo mano, jochiende nowuok oaa kuom ji mang'eny, kagoyo koko ni, " In e Wuod Nyasaye!" To nokwerogi kendo ne ok oyienigi mondo giwuo, nikech neging'eyo ni en e Kristo.

⁴²Kane piny oru, Yesu nodhiyo kar kende. Ji ne manye to kane gibiro kama ne entie, negitemo tame mondo kik owegi. ⁴³To nowacho niya, " Nyaka ayal wach maberni mar Pinyruoth Nyasaye e taonde moko bende, nikech ma e momiyo noora." ⁴⁴To nodhiyo nyime koyalo e sunagoge mag Judea.

Luong Mar Jopuonjre Mokwongo.

5 Chieng' moro achiel, ka Yesu nochungo but nam mar Genesaret, kendo ji kochokore moluore kendo winjo wach Nyasaye ²Noneno yiedhi ariyo e dho wath, mane owe kanyo gi jolupo mane lwoko tondegi. ³Nodonjo ei achiel mag yiedhigo, achiel mane mar Simon, mi nokwaye mondo okwang'e matin oa e dho wath. Eka nobedo piny kendo puonjo ji ka enie yie.

⁴Kane osetieko wuoyo, nowachone Simon ni, "Kiew yie odhi e chuny pi ka matut, mondo uchik tondeu omak rech."

⁵Simon nodwoke, "Ruoth, wasetiyo matek otieno mangima to ok wasemako gimoro. To nikech iwacho kamano, abiro chiko tonde."

⁶Kane gisetimo kamano, ne gimako rech mang'eny ma koro tonde ne chakoyiech. ⁷Kuom mano, ne gigwelo jowetigi mane nie yie machielo mondo obi okonygi, to kane gibiro tone gipong'o yiedhi ariyogo mopong' thich ma koro ne gichako nimo.

⁸Kane Simon Petro oneno mani, nopodho e tiend Yesu, mowacho niya,

"Dhiyo iaa kuoma Ruoth, An ng'at ma jarichol!⁹Nimar en kaachiel gi joma ne engo duto nowuoro nikech rech mane – gimako, ¹⁰Kamano, Jakobo gi Johana ma yawuot Zebedi mane jotiyi gi Simon bende nowuoro

Eka Yesu nowacho ni Simon niya, "Kik iluor; chakre tinendeni ibiro bedo jaywajji." ¹¹Kuom mano ne giketo yiegi oko e dho wath, negiweyo gik moko duto kendo ne giluwe.

Ng'at Man-gi Dhoho.

¹²Kane Yesu ne nie e taon achiel moro, ng'ato nobiro ma dhoho omako dende duto, kane oneno Yesu, nopodho piny ka okulore e lowo kendo nosaye ni, "Ruoth, ka iyie, inyalo miyo abed maler."

¹³Yesu norieyo lwete momulo ng'atno. Nowachone niya, "Ayie. Bed maler! Gikanyono dhoho noa kuome.

¹⁴Eka Yesu nochike ni, " Kik inyis ng'ato to dhiyo, mondo inyisri iwuon e nyim jadolo kendo ichiw misengini ma Musa nochiko nikech puodhruokni, mondo obed ranyisi ne gin.

¹⁵To kata kamano humbe nomedo landoree moloyo, momiyo oganda mag ji nobiro winje kendo mondo ochang tuohegi. ¹⁶To Yesu ne thoro dhiyo kuonde machil ma en kende mondo olem.

Yesu Ochango Jathany

¹⁷Chieng' moro kane opuonjo, Jo-Farisai gi Jopuonj mag chik, mane oa e mier duto mag Galili gi Judea kod Jerusalem, nobedo kanyono, To teko mar Ruoth ne nikode mondo ochang jotuo.

¹⁸Ji moko nobiro kotingo jadhoho e par kendo negitemo mondo gitere ei ot mondo gikele e nyim Yesu. ¹⁹To kan ok ginyal yudo yo mar timo kamauno nikech oganda, negiidho e witado kendo powo witado, eka negilore e pare e dier oganda e nyim Yesu.

²⁰Kane Yesu oneno yiegi, nowachoniya, " Osiepa, richoni oweni."

²¹Jofarisai gi Jopunj mag Chik nochako

paro kendgi giwegi ni, "Mani to ngano ma wacho, wach marach kuom Nyasaye? Ng'ano manyalo weyo richo mak mana Nyasaye kende?"

²²Yesu nong'eyo gima giparo kendo nopenjogi ni, "Ang'o momiyo uparo gigi e chunyu?" ²³Ere mayot wacho, 'Richoni oweni, koso wacho ni, 'Chung kendo iwuothi?' ²⁴To mondo omi ungue ni Wuod Dhano ni gi teko e piny mar weyo richo... Nowacho ni jathany ni, "Awacho ni, chung, kaw pari kendo idhi dala." ²⁵Gikanyono nochungo nodhiyo dala kopako Nyasaye. ²⁶Ji duto nowuoro kendo negichiwo pak ni Nyasaye. Negiwuoro ahinya kendo negiwacho ni, "Waseneno gik malich kawuono."

Luong Mar Lawi

²⁷Bang' mani, Yesu nowuok odhi oko kendo noneno jasol osuru ma nyinge Lawi kobedo kar choko Osuru. Yesu nowachone ni, "Luwa". ²⁸To Lawi noa malo, moweyo gik moko duto kendo noluwe.

²⁹Eka Lawi noloso nyasi mar rwak ni Yesu e ode, oganda maduon' mar josol osuru kaachiel gi ji mamoko nechiemo kodgi. ³⁰To Jofarisai gi Jopuonj mag Chik mag dini margi neng'ur ni jopuonjrene ni, "Ang'o momiyo uchiemo kendo metho gi joso osuru kod joricho?"

³¹Yesu nodwokogi ni, "Ok jomangima ema dwaro jathieth, to jomatuo. ³²Ok asebiro mondo aluong jomakare, to mana joricho mondo gilokre."

Yesu Openji Kuom Wach Tueyo Chiemo

³³Negiwachone ni, "Jopuonjre Johana ne thoro tueyo chiemo kendo lamo, to bende jopuonjre mag Jofarisai timo kamano, to magi dhiyo mana nyime gi chiemo kendo metho."

³⁴Yesu nodwoko ni, "Bende inyalo miyo wend wuon kisera otwe chiemo ka en kodgi?" ³⁵To ndalo biro biro ma wuon kisera nogol kuomgi, e ndalogo gibiro

tueyo chiemo.

³⁶Eka nogoyonigi ngeroni ni; "Onge ng'ama nyalo yiecho dir law manyien kendo otwang'e kuom mano moti. Ka otimo kamano, obiro bedo ni oyiecho law manyien, to dir law matin mar law manyien ok bi winjore kod machon. ³⁷Bende onge ng'ama olo divai manyien e ndede moti. Ka otimo kamano, divai manyien biro yiecho ndede go, divai biro pukore kendo ndede biro kethore. ³⁸Ooyo, divai manyien nyaka oliee ndede manyien. ³⁹To onge ng'ama bang' madho divai machon dwaro divai manyien, owa-cho ni "machon ber molyo"

Ruodh Sabato

6 Chieng' Sabato moro, Yesu nowoutho e puothe mag ngano, kendo jopuonjrene nochako jako wi ngano, negidunyogi e lwetegi mi, gi chamo ngano. ²Jofarisai moko nopenjo ni, "Ang'o momiyo utimo gima chik okwero chieng' Sabato?"

³Yesu nodwokogi niya, "Pok ne usomo gima Daudi notimo kaachiel gi jogo mane nikode ka kech nekayogi? ⁴Nodonjo e od Nyasaye, kendo nokawo makati miketo e nyim Nyasaye, nochamo gima chik oyie ni jodolo kende ema chamo. Kendo nochiwo moko ne jogo mane ni kode." ⁵Eka Yesu nowachonigi niya, "Wuod Dhano en Ruodh Sabato."

⁶Chieng' Sabato machielo nodhiyo ei sunagogi kendo popwonjo, to ng'ato neni kanyo ma lwete korachwich notal. ⁷Jofarisai kod Jopuonj mag Chik ne dwaro gimoro ma dimi gidonjnego Yesu, omiyo ne ging'iyogo machiegni, mondo gine ka dochang' chieng' Sabato. ⁸To Yesu nong'eyo gima negiparo eka nowacho ni ng'atno mane lwete otal ni, "Aa malo kendo chungu e nyim ji duto." Kamano noa malo mi ochungo kanyono.

⁹Eka Yesu nowachonigi niya, "Apenjou, ere gima owinjore gi chik chieng' Sabato, timo maber koso timo marach, reso ngima koso kethe?"

¹⁰Norangogi duto, to eka nowachoni ng'atno niya, Rie lweti oko." Notimo kamano, to lwete nochango chutho. ¹¹To negikecho kendo negichako wuoyo ng'ato gi ng'ato kuom gino ma digitim ni Yesu.

Jopuonjre Apar Gariyo

¹²Chieng' moro achiel Yesu nowuok modhi mo kare gi got mondo olem kendo nobedo otieno mangima kolamo Nyasaye. ¹³Kane okinyi ochopo, noluongo jopuonjre ire kendo noyiero apar gariyo kuomgi, mane owalo obedo jooto. ¹⁴Simon (mane omiyo nying ni Petro); gi owadgi Andrea, Jakobo, Johana, Filipo, Bathlomayo, ¹⁵Mathayo, Thoma, Jakobo wuod Alfayo, Simon mane iluongo ni Jakedo ni piny, ¹⁶Juda wuod Jakobo, gi Juda Ja Iskariot, mane obedo jandhok.

Gweth Gi Kuong'

¹⁷Nolor kodgi piny kendo nochungo kama opie. Oganda maduong' mar jopuonjrene ne nikanyo to kod ji mang'eny moa kuonde duto mag Judea, moa Jerusalem, kendo moa e dho nam mar Turo gi Sidon, ¹⁸mano biro mondo giwinje kendo ochang midekregi. Jogo mane jochiende thago nochangi, ¹⁹To ji duto notemo mondo omule, nikech teko ne aa kuome kendo changogi duto,

²⁰Kong'yo jopuonjrene, nowacho niya, " Un Joma ogwedh jogo modhier, nimar piny Ruoth Nyasaye en maru. ²¹Un joma ogwedhi joma kech kayo koroni, nimar ubiro yieng'. ²²Un jogo mogwedhi ka ji himou, ka gikwedou kendo jarou kendo gidagi nyingu ka rach, nikech Wuod Dhano.

²³"Beduru mamor e ndalono kendo chikreuru ka uil, nikech poku duong' e polo. Nimar mano e kaka kweregi notimo ni jonabi.

²⁴"To okuong'u un jomwandu nimar useyudo poku ²⁵"Okuong'u un jomayieng' maber e kindeni, nimar

ubiro bedo modenyo, Okuong'u un jogo manyiero koroni, nimar ubiro kuyo kendo ywak. ²⁶Okuong'u ka ji duto wuoyo maber kuomu, nimar mano e kaka kweregi notimoni jonabi ma jomiriambo.

Hera Ni Wasigu

²⁷To owachonu un joma mawinja ni: Heruru wasiku, timuru maber ni joma mamon kodu. ²⁸Guedhuru joma kuong'ou lamuru ni joma sandou. ²⁹Ka ng'ato othalo lembi konchiel, to lokne komachielo bende. Ka ng'ato okawo kotini, kik itame kawo sadi. ³⁰Miuru ji duto makwayou, to ka ng'ato okawo gimoro mari, kik idwar ni mondo oduoknigo. ³¹Timuru ni ji mamoko mana kaka duher mondo gin bende gitimnu.

³²Ka uhero joma oherou, en ohala manadi kuomu? Mana, kaka joricho ohero mana joma oherogi. ³³To ka utimo maber ni joma timonu maber, en ohala manadi kuomu? Kata mana 'joricho' timo kamano. ³⁴To ka uholo mana joma un gi adier ni biro dwokonu, en ohala manadi kuomu? Kata mana 'joricho' holo mana 'joricho' kagigeno ni ibiro chulogi duto. ³⁵To heruru wasiku, tim negiuru maber, kendo holgiuru ka ok ugeno ni ubiro yudo gimoro bang'e. Eka poku biro bedo maduong' kendo ubiro bedo yawutu Ng'ama Malo moloyo, nikech ong'won ni jogo ma ok go erokamano kendo jomaricho. ³⁶Beduru mang'won, mana kaka Wuoru ng'won

Ng'ado Bura Ni Joma Moko

³⁷Kik ung'ad, bura kendo bi ok ng'adnu bura. Kik ukuong' ji, to ok bi kuong'u. Weuru ni ji richogi, to ibiro weyonu richou. ³⁸Chiwuru, to ibiro chiwonu. Ubiro yudo rapim maber, moiki kendo motiel mapong' thich, kendo oo oko. Nimar rapim ma utiyogo, mano bende ema nopimnugo."

³⁹Nogoyo nigi ngeroni bende ni: " Ng'at mamuofu bende nyalo telo ni ng'a-

ma muofu"? Donge gi duto ji ariyogo dil-
ing're ei bugo? ⁴⁰Japuonjre ok duong'
moyo japuonjne, to ng'ato ka ng'ato
motiegi chuth biro bedo machal gi
japuonjne.

⁴¹En ang'o momiyi ineno mana pilni
yath mamie wang'owadu. To yath mane
wang'i iwuon to ok idewo? ⁴²Ere kaka
diwach ni owadu ni; owadwa, yie mondo
agol pil yath manie wang'i, ka in iwuon ok
inyal neno yath manie wang'i iwuon? In
jawuondre, mokwongo gol yadhono oko
manie wang'i, to eka ibiro neno maler
mondo igol pil yadhno manie wang'
owadu.

Yath Gi Olembene

⁴³Onge yath maber manyago olemo
maricho, kata yath marach manyago
olemo maber. ⁴⁴Yath ka yath ing'eyo kod
olembe owuon, Ji ok pon ng'ou kuom
yiende mag kudho, kata mzabibu bende
ok pon kuom otonglo. ⁴⁵Ng'at maber golo
gik mabeyo mawuok e keno maber ei
chunye, to ng'at marach golo gik maricho
mawuok e keno marach manie chunye.
Nimar gik mopong'o chunye dhoge
wacho.

Jagedo Mariek Kod Mofuwo

⁴⁶Ang'o momiyi uluonga ni, Ruoth,
Ruoth, to ok utim gima awacho? ⁴⁷Abiro
nyisou kaka ng'atno chalo jalno mabiro
ira kendo winjo wachna, kendo otimogi.
⁴⁸Ochalo gi ng'at magero ot, manokunyo
bur matut nyaka e lwanda kendo noketoe
mise, kane koth ochue ma pi opong'o piny,
apaka magingore nogoyo odno to ne ok
onyal yienge, nikech nogere maber. ⁴⁹To
jal mawinjo wechena to ok otimgi chalo
gi ng'at manogero ot e wi lowo maonge
gi mise. E kindeno ma apaka magingore
nogoyo odno, nogore piny kendo
nokethore chuth."

Yie Mar Jaduong' Lweny

7 Kane Yesu nosetieko wacho magi
duto ka ji winjo, nodhiyo odonjo

Kapernaum. ²Kanyo ne nitie jatich
jaduon' lweny, mane ruodhe ogeno
ahinya, netuo kendo nochiegni gi tho.
³Jaduon' lweny nowinjo humb Yesu,
momiyo nooro jodongo mag Joyahudi ire,
mondo gikwaye obi ochang jatichne.
⁴Kane gibiro ir Yesu negisaye chutho ni, "
Ng'atni owinjore mondo itimne mani,
⁵Nikech ohero pinywa kendo osegeronwa
sunagogi." ⁶Kuom mano, Yesu nodhiyo
kodgi.

Ne ok en mabor gi ot kane jaduon'
lweny nooro osiepeno mondo owachne ni:
"Ruoth, kik ichandri, nikech ok awinjora
ibi idonji e bwo tat oda. ⁷Mani e momiyi
ok asekwonora ni awinjora biro iri. To
wach wach to jatichna biro chango.
⁸Nimar awuon an ng'at manie bwo loch
kod askache manie bwoya. Ka awacho ni
moro ni, 'Dhi' to odhiyo, kendo machielo
ni 'Bi' to obiro. Awacho ni jatichna ni,
Tim ma, to otime."

⁹Kane Yesu owinjo ma nowuore, kendo
kane olokore ir oganda maluwe, nowacho
ni "Awachonu, pok ayudo yie maduon'
kama kata e Israel. ¹⁰Eka jogo maneoro
nodok e ot to negiyudo jatich kangima.

Yesu Ochiero Wuod Chi Liel

¹¹Mapiyo bang' mano, Yesu nodhiyo e
taon miluongo ni Nain, to jopuonjrene gi
oganda maduon' bende nodhi kode.
¹²Kaka nosudo machiegni gi dhoranga
taon ng'at motho noting' igolo oko-
wuowi achiel kende wuod min, to en
dhako ma chi liel. To oganda maduon'
moa e taon neni kode. ¹³Kane Ruoth
onene, chunye nokeche kendo nowacho
ni, "Kik iywagi."

¹⁴Eka nodhiyo machiegni kendo
nomulo sanduku mane oting'e wuowi
manotho, to jogo mane oting'e nochungo.
Nowacho ni, "Wuowi matin, awachoni,
chungi aa malo!" ¹⁵Ng'at mothono nobe-
do piny kendo nochako wuoyo, to Yesu
nodwoke momiyi min.

¹⁶Gin duto luoro nomakogi kendo
negipako Nyasaye. Negiwachoni, "Janabi

maduong' osewuok e dierwa." Kendo ni, "Nyasaye osebiro konyo joge." ¹⁷Wach maberni mar Yesu nolandore e Judea mangima kod piny molwore.

Yesu Kod Johana Jabatiso

¹⁸Jopuonjre Johana nonyise gigi duto. Noluongo ji ariyo kuomgi, ¹⁹ne oorogi ir Ruoth mondo gipenje ni, "In e jalno mane biro koso onego wagen ng'at moro machielo?"

²⁰Ka jogo nobiro ir Yesu, negiwachoni, "Johana Jabatiso noorowa iri mondo wapenj ni, "In e jal mane biro, koso wagen ng'ato moro machielo?"

²¹E saa nogono Yesu nochango ji mang'eny manenigi tuoche, midekre kod chunje maricho, kendo nomiyo muofni mang'eny mondo onen. ²²Kamano nowacho ni jogo manoor ni, "Doguru kendo unyis Johana gik mauseneno kendo winjo: muofni neno, rong'onde wuotho, jogo man gi dhoho ichango, joma itgi odinore winjo, jomatho ichiero, kendo wach maber iyalo ni jochan. ²³En ng'at mogwedhi jal maok chwanyre mabar nikech an,"

²⁴Bang'e ka jopuonjre Johana nousea odhi, Yesu nochako wuoyo ni oganda kuom Johana ni: "Ang'o mane udhiyo e thim mondo une? Odundu ma yamo yiengo? ²⁵Ka ok mano, en ang'o mane udhi mondo une? Ng'at morwakore gi lewni mabeyo? Ooyo, jogo marwako lewni manengogi tek kendo madhialore gi gik mabeyo nie ute ruodhi. ²⁶To un nudhi mondo une ang'o? Janabi? Ee, Awachonu, kendo mana moloyo janabi. ²⁷Mani e jal mane ondik kuome ni:

"Abiro oro jaotena motelo nyimi, mabiro loso yori motelo ni.

²⁸Awachonu, kuom jogo ma mon onyuolo onge ng'ato maduong' moloyo Johana; kata kamano jalo matinie moloyo e piny Ruoth Nyasaye doung' moloye.

²⁹Ji duto, kata mana jasol osuru, kane giwinjo weche Yesu, negiyie ni yor Nyasaye ni kare, nikech nosebatisgi gi

Johana. ³⁰To Jofarisai kod jogo molonye chik nodagi dwaro mar Nyasaye kuomgi giwegi, nikech nepok obatisgi gi Johana.

³¹"Koro ere gima dapingo ji mar tieng' ma kawuononi Gichalo gi ang'o? ³²Gi chalo nyithindo mobedo e chiro kendo luongore kendgi moro ka moro ni:

"Nende wagoyonu thum, to ok ne umiel; bende ka wagoyonu nduru, to ne ok uywak."

³³Nimar Johana Jabatiso ne obiro maok ocham makati kata madho divai, to uwacho ni, "En gi jachien. ³⁴Wuod Dhano nobiro kachiemo kendo metho, to uwacho ni, Ma eri jawuoro kendo jamer, osiep josol osuru duto kendo joricho. ³⁵To rieko ofwenty adimba gi nyithindo.

Yesu Owir Gi Mo Kod Dhako Majaricho

³⁶Koroni Jafarisai achiel, moro noluongo Yesu mondo ochiem kode nodhiyo e od Jafarisai mobedo but mesa. ³⁷Kane dhako mane osedak e ngima mar richo e taondno (dalano) nowinjo ni Yesu ne chiemo e od Jafarisai, nokelo chupa mar alabasta mar mo mang'ue ng'ar, ³⁸kendo nochungo e toke, but tiende, pi wang'e nolwar e tiendege ma gitimo pi eka noyueyogi gi yie wiye, monyodhogi kendo noolo mo kuomgi.

³⁹Kane Jafarisai mane oluonge oneno ma, nowacho owuon ni, "Ka da ng'atni en janabi, da ong'eyo jal ma muleni kendo ni en dhako machalo nadi- ni en jaricho."

⁴⁰Yesu nodwoke ni, "Simon, an-gi gima adwaro wachoni," Nowachone ni, wachna, Japuonj."

⁴¹"Ji ariyo ne nigi gop jahol pesa, moro. Achiel negigope mar siling' mia abich, to machielo piero abich. ⁴²Giduto ji ariyogi ne gionge gi pesa magichulego, omiyo noweyonigi gopegi. Koro en mane kuom-gi mabiro here moloyoe?"

⁴³Simon nodwokoni, "Aparo ni jalno mane nigi gowi maduong' mowene."

Yesu nowacho ni, "Isedwoko kare."

⁴⁴Eka nolokore mong'iyi dhakono

mowacho ni Simon, niya, "Ineno dhakoni? Nabiro odi. Ne ok imiya pi moro amora mondo alwok go tiendena, to nolwoko tiendena gi pi wang'e kendo noyueyogi gi yie wiye. ⁴⁵To in ne ok inyodha, to dhakoni chakre saa mane adonjo, ne ok oweyo nyodho tiendena. ⁴⁶Ne ok iolo mo e wiya, to oseolo mo mang'ue ng'ar e tiendena. ⁴⁷Emomiyo, awachoni, richone mathoth owene – nikech nohero mathoth. To jal mowene manok, ohero matin."

⁴⁸Eka Yesu nowachone, "richoni oweni."

⁴⁹Welo mamoko nochako wacho kendo gi giwegi ni, "Mani en ng'a ma weyo niji richogi?"

⁵⁰Yesu nowacho ni dhakono ni, "Yieni oseresi; dhi gi kuwe."

Ngech Ja Chuoyo

8 Bang' ma, Yesu newuotho koa e taon ka taon kod gweng' ka gweng' ka olando wach maber mar Piny Ruoth Nyasaye. Jopuonjrene apar gariyo ne ni kode, ²kaachiel gi mine moko mane osegol kuomgi jochiende kendo ochang tuochege kaka Mariam (mane iluongoni Magdala) mane jochiende abiriyo osewuok kuome; ³Joana chi Chuza, mane jatelo e od Herode gi Susana kod mon mamoko mathoth. Mon-gi nekonyogi kagichiwonegi gigege giwegi.

⁴Ka noyudo oganda maduong' chokore kendo ji ne biro ir Yesu moa e taon ka taon nogoyo negi ngeroni: ⁵Japur nodhiyo chuoyo kothe. Ka noyudo nokiro kothe, moko nolwar e yo mi nonyon-gi kendo winy nochamogi. ⁶Moko nolwar ewi lwanda mine giti kendo neginer nikech negi onge kod ng'ich. ⁷Kothe moko nolwar e dier kudho, mane odongo kode kendo nohung' cham. ⁸Bende lodhi moro nolwar e lowo maber. Noti kendo nonyago cham, nyadi mia moloyo kaka nochuoye.

Ka nowacho ma, nogoyo koko ni, "Ng'at man-gi ite mawinjo, mondo owin-

ji."

⁹Jopuonjre nopenje gima ngerono nyiso. ¹⁰Nowacho ni, "Ng'eyo mar gik mopondo mag Piny ruoth Nyasaye osemiu, to ji ma moko awuoyo nigi gi ngerini, omiyo,

"kata ging'icho, to ok ginyal neno, kata giwinjo, to ok nyal donjonigi."

¹¹Ma e gima ngeroni nyiso: Kodhi en wach Nyasaye. ¹²Molwar e yo gin jogo mawinjo, to jachien biro kendo golo wach ei chunygi, mondo kik giyie ma wargi. ¹³Molwar e lwanda gin jogo ma rwako wach gi mor ka giwinje, to gionge gi tiende. Giyie kuom kinde moromo, to e kinde mag tem gipodho gaa. ¹⁴Kodhi molwar e dier kudho ochungo kar jogo mawinjo, to ka gidhiyo e yoregi, to par-ruok mar ngima, mwandu kod mor mar piny thungogi, ma ok gidong motegno. ¹⁵To kodhi manie low maber, ochungo kar jogo man gi chuny malongo' kendo maber, mawinjo wach, okane, kendo bedo modhil onyago cham.

Taya E Rachungi

¹⁶Onge ng'ato mamoko taya kendo pande ei sufuria kata kete e bwo otanda. Kar timo kamano, to okete ewi rachungi taya, mondo jogo madonjo one ler. ¹⁷Nimar onge gimoro mopandi maok bi elore, kendo onge gima oum maok nong'ere kata bedo e lela. ¹⁸Emomiyo paruru ahinya maber kaka uwinjo. Ng'at man-go nomedne moko; ng'at maongego, kata mano moparo ni en-go ibiro maye."

Min Yesu Gi Owetene

¹⁹Koro min Yesu gi owetene nobiro mondo ginene, to ne ok ginyal sudo machiegni kode nikech oganda. ²⁰Ng'at moro nowachone ni, "Meru gi oweteni ochungo oko, gidwaro neni."

²¹Nodwoko ni, "Mamana kod owetena gin jogo mawinjo wach Nyasaye kendo timo."

Yesu Okweyo Apaka

²²Chieng' moro Yesu nowacho ni jopuonjrene ni, "Wadhiuru loka nam kocha." Omiyo negidonjo ei yie kendo giwuok gidhi. ²³Kane gikwang', nindo notere. Eka ahiti mangongo notugore e nam, koro yieno ne pong gi pi kendo ne gin e chandruok maduong'.

²⁴Jopuonjre nodhiyo ire mochiewe, ka giwacho ni, " Ruoth, Ruoth, wabiro nimo!"

Nochungo oa malo kendo nokwero yamo gi apaka mager mi ahiti nopie kendo gik moko duto nokuwe. ²⁵Nopenjo jopuonjrene ni, "Ere yieu?"

Luoro nomakogi kendo negiwuoro mine gipenjore giwagi ni, " Ma en ng'a? Ochiko yamo koda pi, to giwenje."

Chango Mar Ng'at Man Gi Jachien

²⁶Ne gikwang' gichopo e piny jo-Gerasani, man loka nam Galili. ²⁷Kane Yesu owuok oko e dho wath, ng'at moro man-gi jochiende moa e taondno, noromo kode, kuom kinde mang'eny ng'at ni ne pok orwako law kata dak ei ot, to nodak e dier liete. ²⁸Kane oneno Yesu, noywak matek kendo nopodho e tiende, kogoyo koko gi duol mamalo niya, "Ang'o midwaro timo koda, Yesu, Wuod Nyasaye Ma Malo Moloyo? Asayi, kik isanda!" ²⁹Nimar noyudo Yesu osechiko jachien marachno mondo owuog oa kuom ng'atno. Kuom kinde mang'eny nomake, to kata nosetwe lwete, tiende gi nyororo, kendo okete e bwo jarit, nosebedo kocho-do nyororo kendo jochiende ne riembe nyaka e thim.

³⁰Yesu nopenje ni, " Nyingi ng'a? Nodwoko ni " Oganda", nikech jochiende mang'eny nosedonjo kuome. ³¹To ne gikwaye monuore mondo kik ochikgi gidhiyo e Bur Matut Maonge Gikone.

³²To kueth maduong' mar ngurue ne kwayo e bath got kanyo. Jochiende nosayo Yesu mondo gidonji e igi, mi nomiyogi thuolono. ³³Kane jochiende nowuok oa ei ng'atno, ne gidhiyo gidonjo ei ngurue, to

kueth noringo kamuomoro kalor mwalo kama ne giridore nyaka nam.

³⁴Kane jogo makwayo ngurue oneno gima nosetimore, negiringo gidhiyo gitero wach e taon kendo e gweng' duto.

³⁵Mi ji nowuok mondo gine gino mosetimore. Kane gichopo ir Yesu, negiyudo ng'atno ma jochiende nosewuok kuome, kobedo piny e tiend Yesu, korwakore kendo ka parone ni kare; luoro nomakogi. ³⁶Jogo mane oneno gima notimore nonyiso ji kaka ng'at mane nigi jochiende nochangi ³⁷Eka ji duto manie gweng' Gersani duto nokwayo Yesu mondo odar odhi owegi, nikech luoro maduong' nomakogi. Omiyo nodonjo ei yie kendo noa kanyo

³⁸Ng'at mane jochiende owuok kuome, nosaye mondo odhi kode, to Yesu notame, ka wachone ni ³⁹Dogi dala kendo inyis ji gik mang'eny ma Nyasaye osetimoni. Omiyo ng'at no nowuok odhi kendo monyiso taon duto mang'eny ma Yesu nosetimone.

Nyako Motho Gi Dhako Matuo

⁴⁰Koro ka Yesu oduogo, oganda norwake nimar negirite giduto. ⁴¹Eka ng'ato moro miluongo ni Jairo, jatich Sunagogi, nobiro nopodho e tiend Yesu, kosaye mondo odhi ode, ⁴²nikech nyare achiel kende, nyako madirom ja higni apar gariyo, ne tho.

Ka Yesu ne nie yo, oganda nothunge madihinye. ⁴³To dhako moro ne ni kanyo mane osebedo ka iye chuer kuom higni apar gariyo to onge ng'at ma ne nyalo change. ⁴⁴Nobiro gi yo ka dier ng'eye kendo nomulo riak nangane, kendo iye machuer nochok gikanyono.

⁴⁵Yesu nopenjo ni, "Ng'ano momula?" kane gi duto gikwer; Petro nowacho ni, " Ruoth, ok neye kaka olwuori kendo othungi.

⁴⁶To Yesu nowachoni, "Ngato moro nomula; Ange'yo nikech teko oswuok kuoma"

⁴⁷Eka kane dhakono oneno ni ok onyal

dhi ma ok onene, nobiro ka osetni kendo nopodho e tiende. Nohulo e nyim ji duto gimomiyo nomule kendo kaka nochango sano sano. ⁴⁸Eko nowachone ni, "Nyara, yieni ochangi. Dhi gi kue."

⁴⁹Kane Yesu pod wuoyo ngato moro nobiro moa eod Jairo, jatelo mar Sunagogi, nowachoni, "Nyari osetho." omiyo "kik ichand japounj kendo."

⁵⁰Kanowinjo ma, Yesu nowacho ne Jairo ni "kik iluor, yie ayieya kendo obiro chango."

⁵¹Kane ochopo e od Jairo, ne ok oyie ni ng'ato moro amora mondo odonj kode mak man Petro, Johana gi Jakobo kod woun nyathi gi min mare. ⁵²Gie kendino, ji duto ne goyo nduru kendo Yesu nowachonigi ni, "Weuru ywak" nimar "ok otho to onindo."

⁵³Negi nyiere, nikech ne ging'eyo ni osetho. ⁵⁴To nomake gi lwete kendo nowacho ni, "Nyathina, chungu ia malo. ⁵⁵Chunye nodwogo, kendo nochung' oa malo sanosano. Eka Yesu nowachonigi mondo gimiyе gimoro ocham. ⁵⁶Jonyuolne nohum, to nomiyo gi chik ni kik ginyis ng'ato moro amora gima nose-timore.

Yesu Ooro Jopuonjre Apar Gariyo

9 Kane Yesu noseluongo ji apar gariyogo kaachiel, nomiyogi teko kod nyalo mar goalo jochiende duto kendo chango tuoche, ²kendo noorogi oko mondo giyal Piny ruoth Nyasaye kendo chango jomatuo. ³Nowachonegi ni, "Kik uting' gimoro ka udhi e wuoth: luth kata dende kata chiemo, kata pesa, kata sede moko ⁴Ot mor amoro mudonje, ubed kanyono nyaka ua e taondno. ⁵Ka ji ok orwakou, uteng' buch tiendeu sama uwuok e taondgi kaka siem ne gin." ⁶Kamano ne giwuok magi dhiyo e gweng' ka gweng', ka giyalo injili kendo gichango ji kuonde duto.

⁷Koro Herode ma ruoth nowinjo gik moko duto matimore, to noparore, nikech ji moko ne wacho ni Johana osechier oa kuom jomotho. ⁸Jomoko to ni Elija ose-

fwenyore, to bende moko to ni achiel kuom jonabi machon osebedo mangima kendo. ⁹To Herode nowacho niya, Johana ne asenga'do wiye, koro ma, to nga ma awinjo gik maka magi kuome? Kendo notemo mondo onene

Yesu Opidho Ji Alufu Abich

¹⁰Kane joote oduogo ne ginyiso Yesu gima ne gisetimo. Eka nokawogi modhi kodgi kaachiel kar kendgi e taon miluongo ni Bethsaida, ¹¹to oganda nowinjo mano kendo ne giluwe. Norwakogi kendo nowuoyo kodgi kuom loch mar Piny ruoth Nyasaye, kendo nochango jogo mane dwaro chang.

¹²Kar seche moko mag odhiambo Jopuonjre apar gariyo nobiro ire kendo negiwacho ni "We oganda ji odogi mondo gidhi e mier machieigni kod gwenge mondo giyud chiemo kod kwonde nindo, nikech wan oko kuma bor.

¹³Nodwoko ni, "Un, migiuru gima di gi cham." Negidwoko niya, "Wan mana gi makati abich gi rech ariyo kende- makmana ka wadhi wangiewo chiemo ne ogandani duto," ¹⁴Ne nitie ji ma chwo kanyo ma dirom alufu abich.

To nowacho ni jopuonjrene niya, "Nyisgiuru gibed piny e girube mag ji madirom piero abich, moro ka moro. ¹⁵Jopuonjre notimo kamano kendo giduto negibedo piny. ¹⁶Nokawo makati abich kod rech ariyogo eka nong'i yo malo, mogoyo erokamano kendo nong'ingogi. Eka nomiyogi jopuonjre mondo giketgi e nyim ji. ¹⁷Gi duto negichiemo mi giyeng', to jopuonjre nochoko ng'injo mag chiemo mane ji ochamo oweyo aditini apar gariyo mopong'.

Petro Ohulo Kristo

¹⁸Chieng' moro kane Yesu lemo kama opondo, to jopuonjre neni kode, nopenjoggi ni, "Oganda wacho ni an ng'a?"

¹⁹Negidwoko ni, "Jomoko wacho ni Johana Jabitiso, to mamoko wacho ni Elija to bende jomamoko, ni achiel kuom jonabi

machon osebedo mangima kendo."

²⁰Nopenjogi ni, "Un to uwacho ni an ng'a?"

Petro nodwoko ni, "Kristo mar Nyasaye."

²¹Yesu nokwerogi matek mondo kik ginyis, ng'ato ang'ata wachni. ²²Kendo nowacho ni, "Wuod Dhano nyaka yud sand malit mang'eny, kendo okwede gi jodongo, madongo kod jopuonj chik, bende nyaka nonege kendo chieng' mar adek nochiere."

²³Eka nowachonigi duto ni, "Ka ng'ato moro dwaro luwa, nyaka okwedre owuon kendo oting' msalape ndalo duto eka oluwa. ²⁴Nimar ng'atno madwaro reso ngimane ngimane nolane, to ng'at mowito, ngimane ne an abiro rese. ²⁵Ere ber ma ng'ato nyalo yudo ka onuang'o piny duto, to olalo kata owiti ngimane. ²⁶Ka ng'ato wiyie kuot koda kod wechena, Wuod Dhano bende wiyie biro kuot kode ka obiro duogo gi duong'ne kendo e duong' mar Wuoro kod mar malaike maler. ²⁷Awachonu adier ni ntie jomoko mochungo ka maok nobil tho kapok gineno Piny ruoth Nyasaye.

Kit Yesu Olokore

²⁸Kar ndalo ma dirom aboro bang' ka Yesu nosewacho mani, nokawo Petro, Johana gi Jakobo kaachiel kode kendo negidhiyo malo e wi got mondo gilam. ²⁹To kane olamo, kit wang'e nolokore, kendo lepe nolokore marieny ka ler mar mil polo. ³⁰Ji ariyo, Musa gi Elija, ³¹nofwenyore e duong' maler, ka giwuoyo gi Yesu negiwuoyo kuom thone, mane koro ochiegni miyo ochopi e Jerusalem. ³²Petro kaachiel gi jowadgi ne nindo oingo ahinya, to kane gichiewo maber, ne gineno duong'ne kod ji ariyo kochungo kode. ³³Kane jogo weyo Yesu, Petro nowachone niya, "Jaduong' en gima ber mondo wabed ka eri. We mondo wager kiche achiel mari, achiel mar Musa to machielo mar Elija." Ne ok ong'eyo gino mane owacho.

³⁴Kane pod o wuoyo, bor polo nobiro apoya moimogi, kendo ne giluur kane bor polono noumogi. ³⁵Eka duol moro noa e bor polo, kawacho niya. "Ma e Wuoda, maseyiero; winjeuru." ³⁶Kane duol osewuoyo, ne giyudo ni Yesu ni kende. Jopuonjre nokano wachni e kindgi gie kindeno kuom gino mane giseneno.

Ochang Wuowi Man-Gi Jachien Marach

³⁷Kinyne, kane gibiro gilur gia got, oganda maduong noromone ³⁸Ngat moro e dier oganda noluongo matek niya. "Japounj akwayoi, rang e wuodani, nikech en nyathina achiel kende. ³⁹Ndalo duto jachien make kendo ogoyo koko koyuak, ogoye piny koguecho oriere, kendo dhoge wuok buoyo. ⁴⁰Nende akwayo jopuonjre magi mondo giriembe oko, to ne ok ginyal.

⁴¹Yesu nodwoko ni. "Yaye, tieng' maonge yie kendo mobam to, nyaka karang'o ma dabed kodu kendo chandra kodu." Kel ane wuodi ka.

⁴²Kata e kindeno mane wuwino ne biro, jachien nogoye piny mi noguecho marach.

To Yesu nokwero jachien marachno mi nochango wuwino, kendo no chiwene wuon mare. ⁴³Kendo gi duto ne giwuoro duong' mar Nyasaye, kane ji duto wuoro kuom gigo duto ma Yesu notimo, nowacho ni jopuonjrene ni. ⁴⁴"Chikuru itu maber ni gino madwaro nyisou: Wuod Dhano ibiro ndhogo e lwet ji." ⁴⁵To ne ok giwinjo tiend wachni. Ne opandorenegi, momiyo ne ok ging'eyo tiende, kendo ne giluur penje kuom wachno.

Ng'ano Mabiwo Bedo Maduong Molojo

⁴⁶Mbaka nowuok e kind jopuonjre ni en ng'ano kuomgi mane duong molojo. ⁴⁷Kaka Yesu nong'e yo parogi, noka wo nyathi matin kendo nokete ochungo bute. ⁴⁸Eka nowachonegi niya, "Ng'ato ang'ata morwako nyathi matinni e nyinga orwaka

to ng'ama orwako, orwako jal man oora. Nimar ng'at matin mogik kuomu duto en ng'ama duong' molooyo."

⁴⁹Johana nowacho niya, "Jaduong', ne waneno ng'ato kariembo jochiende e nyingi kendo ne watemo tame, nikech ok en achiel kodwa."

⁵⁰Yesu nowacho ni. "Kik utame to "nimar ng'at maok mon kodu en jakoru."

Akweda Mar Jo Samaria.

⁵¹Kane kinde ochopo monego terego malo e polo, Yesu noketo chunye motegno mondo odhi Jerusalem.⁵²Eka nooro joote mondo otel nyime odhi e dala jo- Samaria mondo oikne gik moko. ⁵³To ji man kanyo ne ok orwake, nikech nodhiyo Jerusalem. ⁵⁴Kane jop-uonjre, Jakobo gi Johana ne oneno mani, ne gipenjo ni, "Ruoth idwaro ni mondo waluong mach oa e- polo obi otiekgi koso? ⁵⁵To Yesu nolokore, mokwerogi, ⁵⁶eka ne gidhi e dala machielo.

Nengo Mar Luwo Yesu.

⁵⁷Kane oyudo giwuotho e yo, ng'at moro nowachone niya, "Abiro luwi kamoro amora mi idhiye."

⁵⁸Yesu nodwoko niya, "Bwe nigi buchegi kendo winy map polo nigi utegi, to Wuod Dhano onge gi kama oketie wiye."

⁵⁹Nowacho ni ng'at machielo ni, "Luwa." To ng'atno nodwoko niya, "Ruoth, mokwongo yiena mondo adog ayik wuora."

⁶⁰Yesu nowacho ni, "We joma otho oyik jogi motho, to in dhiyo kendo iland wach Loch Nyasaye."

⁶¹To pod ng'at machielo moro nowachone ni, "Abiro luwi, Ruoth, to mokwongo, yiena adogi mondo adhi goyo oriti ni joodwa."

⁶²Yesu nodwoko ni, "Ng'ama osemako kwer dhok to pod ng'iyo chien ok owinjore ni tich mar Loch Nyasaye.

Yesu Ooro Ji Piero Abiriyo Gariyo

10 Bang' mani, Ruoth noyiero ji piero abiriyo gariyo ma moko, kendo noorogi ariyo, ariyo mondo otel nyime e taonde duto kod kamoro amora mane obiro dhiyoe. ²Nowachonegi ni, "Cham ochiek mathoth, to jotich nok kuom mano kwauru Ruodh keyo mondo oor jotich odhi e puothe mar keyo. ³Dhiuru! Aorou oko mana ka rombe e dier ondiegi. ⁴Kik uting' ofuk pesa, kata sandug wuoth, kata mana opato, kendo kik umos ng'ato e yo.

⁵Ka udonjo e ot to wachuru mokuongo ni, kuwe obedi e odni." ⁶Ka ng'at kuwe ni kanyo to kuwe maru nobed kuome; to ka ok kamano, to kuweuno noduognu. ⁷Beduru e odno, ka uchamo kendo umadho gimoro amora ma gimiyou, nimar jatich owinjore gi pokne. Kik uring ka ua e ot ka ot.

⁸Ka udonjo e taon mi orwaku to chamuru gino ma oket e nyimu. ⁹Changuru jomatuo man kanyo kendo wachnegiuru ni, "Loch Nyasaye chiegni kodu," ¹⁰To ka udonjo e taon moro to ok orwaku, dhiuru e yoregi matindo kendo uwach ni, ¹¹"Kata mana buch taondu momoko e tiendewa wateng'o kuomu. To beduru kung'eyo maler ni, 'Loch Piny ruoth Nyasaye chiengini." ¹²Awachonu ni, nobed maber berie ni Sodom maloyo taondno.

¹³Yaye mano kaka unune malit un jo Korazin! Yaye, mano kaka unune malit un jo Bethsaida! Nimar ka dine honni mutimnugi dinetim ni Turo gi Sidon to dine giselokre chon ka giruakore gi lep gugru, kendo gibet e buru. ¹⁴To enobed maber berie ne Turo gi Sidon e ndalo mar ng'ado bura molooyo ne un. ¹⁵To in Kapernaun bende ibiro ting'oi malo nyaka polo koso? Ooyo, ibiro boloi piny nyaka piny joma otho.

¹⁶Ng'at ma winjou, winja, ng'at modagi odaga, kendo ng'at modaga odagi Jal ma noora."

¹⁷Ji piero abiriyogo noduogo kod ilo mi giwacho ni, "Ruoth koda ka jochiende be winjowa e nyingi,"

¹⁸Nodwoko niya; "Ne oneno Satan kalor aa e polo mana kamil polo. ¹⁹Asemiyu loch mondo unyon thuonde gi thomoni kendo ulo teko duto mag jasigu bende onge gima nohinyu. ²⁰To kik uil ni jochiende winjou, to iluru ni nyingu ondiki e polo.

²¹E saa nogo, ka Roho Maler nomiyo Yesu opong' gi ilo, nowacho niya, "Apakoi, Wuoro, Ruodh polo gi piny, nikech isepando gigi ne joma riek gi joma osomo, to ise fwenyogi ne nyithindo matindo. Ee, Wuoro, nimar mano e gima ne berni timo.

²² Wuora osemya gik moko duto, onge ng'ama ong'eyo Wuowi makmana Wuoro, kendo one ng'ama ong'eyo Wuoro mak mana Wuoi kaachiel gi joma wuowi oyiero mondo ofwenyegi."

²³Eka nolokore ir jopuonjrene kendo nowachonegi kar kendgi ni, "Ogwedhi wenge maneno gik munenogi. ²⁴Nimar awachonu ni jonabi mang'eny kod ruodhi negombo neno gik muneno to ne ok gineno kendo winjo gik muwinjo gi to ne ok giwinjo,"

Ngech Ja Samaria Maber

²⁵Chieng' moro achiel, ng'at moro molony e chik nochung mondo otem Yesu nopenjo ni, "Japuonj, ang'o ma nyaka atim eka acham ngima mochwere?"

²⁶Nodwoko ni, " 'Ang'o mondiki e chik? Isome nade?"

²⁷Nomedo dwoke ni, "Her Ruoth Nyasachi gi chunyi duto gi dhandi duto, gi tekoni duto kendo gi pachi duto, bende her nyawadu kaka iherori iwuon," ²⁸Yesu nodwoke ni, " Isedwoko kare, tim kamano, eka inibed mangima."

²⁹To kaka nodwaro pwoyore kendo nomedo penjo Yesu ni, "Nyawadwa to en ng'a?"

³⁰Koro Yesu nodwoke niya, Ng'at

moro nolor koa Jerusalem kadhi Jeriko kendo nopo kopodho e lwet jomecho. Ne gi lonyo lepe, gigoye, kendo, giweye kochiegni tho. ³¹To noyudo Jadolo moro lor koluwo, yorno, to kane oneno ng'atno, nobaro moluwo bath yo komachielo. ³²Kamano bende, ja – Lawi moro kane ochopo kanyo monene nokadho gi koma chielo. ³³To ja-Samaria moro kane ni e wuoth nochopo kama ne ng'atno nitie, kendo ka nonene, nokeche. ³⁴Nodhiyo ire motweyo adhondene kooloe mo kod divai. Eka noketo ng'atno e ng'e pundane owuon kendo notere e od buoro kendo norite maber. ³⁵Kinyne nogolo pesa mamingli mag fedha ariyo nomiyo jarit odno. Nowacho ne niya " Rite' to ka aduogo abiro chuli nengo ma imedo ritego!

³⁶"Kuom ji adekgi ere miparo ni ne en wadgi ng'at mane opodho e lwet jomechogo?"

³⁷Ng'at molony gi chik nodwoko ni en "Jal mane okeche."

Eka Yesu nowachone ni, "Dhi kendo itim kamano."

Yesu E Od Maritha Gi Mariam

³⁸Kanoyudo Yesu gi jopuonjrene nie yo, nochopo gweng' kama dhako miluongo ni Maritha norwake e ode. ³⁹Ne en gi nyamin mane iluongo ni Mariam, mane obet piny, e tiend Ruoth kowinjo gima owacho. ⁴⁰To Maritha nodich gi tich mang'eny mane nyaka tim. Nodhiyo ire mopenjo ni, "Ruoth, ok idewo ni nyamera oweya atiyu mana kenda nyise mondo okonya!"

⁴¹Ruoth nodwoke ni, "Maritha, Maritha, iparori kendo ithagori kuom gik mang'eny kayiem, ⁴²to gimoro achiel kende ema dwarore. Mariam oseiyero gima ber moloyo kendo ok nomaye ngang'.

Puonj Mar Yesu Kuom Lamo

11 Chieng' moro Yesu ne lamo kamoro. Kane otieko, achiel

kuom jopuonjrene nowachone ni, "Ruoth, puonja lamo, kaka Johana bende nopuonjo jopuonjrene." ²Nowachone "Ka ulamo to wachuru ni,

"Wuonwa, nyingi mondo omi luor, pinyruok man obi. ³Miwa odiechieng' kodiechieng' chiembwa mapile. ⁴Wenwa richowa nimar wan bende waweyo ni ji duto matimonwa marach. Kendo kik iterwa e tem."

⁵Eka nowachonegi ni, "Ka dipo ng'ato kuomu nigi osiepene to odhi dier otieno mi owachone ni, "Osiepna holae makati adek, ⁶nikech osiepna moro mane, nie wuoth osebiro lima to aonge gimoro ma anyalo keto e nyime.

⁷Eka jal mane nie ot nodwoke ni, "We chanda. Dhoot oselor, kendo nyithinda ni koda e otande. Ok anyal chungo kendo miyi gimora amora. ⁸Akonu ni kata obedi ni ok onyal aa malo mondo omiye makati kaka osiepne, to nikech kinde ma ng'atno obiro oa malo mi miye moromo kaka odwaro.

⁹Omiyo awachonu ni, "Kwauru to nomiu; dwaruru to unuyudi kendo duong'uru to noyawnu. ¹⁰Nimar ng'ato ka ng'ato makwayo imiyo, ng'ato madwaro nwang'o. kendo ng'ama duong'o, noyawne dhoot.

¹¹" En ng'a kuomu, wuone, ma ka wuodi okwai rech, to imiye mana thuol? ¹²Kata kokwayoi tong' gweno, imiye mana okela? ¹³Ka un, ma un joricho kamano, ung'eyo kaka duchiw mich mabeyo ne nyithindu, koro Wuoro manie polo biro chiwo Roho Maler maromo nade ni joma nokwaye.

Yesu Gi Belzebub

¹⁴Chieng' moro Yesu neriembo jachien ma momo. Kane jachien oa, ng'atno ma momo nowuoyo, kendo oganda nohum nono. ¹⁵To moko kuomgi nowacho ni, "Beezebub ruodh jochiende, ema ogologo jochiende oko." ¹⁶Jomoko to noteme ka

kwaye ranyisi moa e polo.

¹⁷Yesu nong'eyo parogi mi nowacho negi ni, " Pinyruoth mora amora mopogore owuon nyaka kethre, to ot mopogore kende biro gore piny. ¹⁸Ka Satan opogore owuon, ere kaka pinyruodhe nyalo chungo? Awacho mani nikech uwacho ni ariembo jochiende oko gi teko Beelzebub. ¹⁹Koro ka ariembo jochiende oko gi teko Beelzebub joma luwou to kara gologi gi teko mar ng'a? Emomiyo, ginibed jong'adnu bura. ²⁰To ka ariembo jochiende oko gi lwet Nyasaye to kare loch Nyasaye osebironu.

²¹Ka ng'at maratego, momanore gii lweny orito ode owuon to gige duto ritore maber. ²²To ka ng'at maratego moloye omonje mi oloye to omayo ng'atno gii lweny mane okete e genone, kendo oyako gige odhigo.

²³"Ng'at maok ni koda mon koda, kendo maok chok koda, keyo giga

²⁴"Ka jachien marach osewuok oa kuom ng'ato odhiyo kuonde motwo komanyo kar yweyo to ok oyudi. Eka owacho niya, 'Abiro dok e oda mane aweyo.' ²⁵Ka ochopo, to oyudo ka ot oywe maler kendo ochan maber. ²⁶Eka odhiyo kendo oomo jochiende abiriyo moko maricho moloyo, kendo gibiro gidak kanyo. To giko enni ngima ng'atno bedo marach moloyo, kaka nochalo mokwongo."

²⁷Ka noyudo Yesu wacho wechegi dhako moro maneni ei ogandano nowacho matek ni, "Miyo mane onyuoli kendo odhodhi oguedhi,"

²⁸Nodwoko niya, "Jogo moguedhi gin mana joma winjo wach Nyasaye kendo time."

Ranyisi Mar Jona

²⁹Ka noyudo oganda medore, Yesu nowacho ni "Ma en tieng' marach. Okwayo ranyisi mar honni, to onge ma ibiro miye makmana ranyisi mar Jona. ³⁰To mana kaka Jona ne en ranyisi ne jo-Nineye e kaka Wuod Dhano biro bedo ni

tieng'ni. ³¹Ruoth ma dhako mar piny mil-
ambo nochung' chieng' bura kaachiel gi
tieng'ni kendo enong'adnegi bura, ni mar
noa e tung' piny mondo owinj riekö
Solomon, to koro nitie ng'ato ka
maduong' moloyo Solomon. ³²Jo Nineve
biro chung' e bura kaachiel tieng'ni kendo
nongadnegi bura; nikech ka Jona ne
oyalonge to ne gilokore, to koro nitie
ng'ato ka maduong' maloyo Jona.

Taya Mar Ringruok

³³Onge ng'ato mamoko taya to okete
kama obiro pondoe, kata e bwo sufuria.
Kar timo kamano to okete ewi rachungi
taya mondo jogo madonjo one ler.
³⁴Wang'i e taya mar ringri, ka wengegi
ber, ringri duto opong' gi ler. To ka gi
richo, ringri bende mudho opong'ö.
³⁵Omiyo, neuru, ni ler manie iu ok en
mudho. ³⁶Emomiyo, ka ringri duto
opong' gi ler, kendo ka onge mudho
kuome kamora amora to obedo maler
chutho, mana ka gima ler mar taya rieny
kuomi,"

Masirni Auchiel

³⁷Kane Yesu osetieko wuoyo, Jafarisai
moro norwake mondo gichiem kode,
omiyo nodonjo iye kendo nobedo kodgi e
mesa. ³⁸To jafarisai kanoneno ni Yesu ne
ok okuongo ologo motelo ni chiemo,
nowuoro.

³⁹Eka Ruoth nowachone niya, "Koro
un Jafarisi ulwoko ng'e kikombe gidis to,
gie chunyu to opong' gi wuoro kod timbe
maricho. ⁴⁰Un joma ofuwo gi! Donge Jal
mane ochueyo ng'e gik moko, ema
nochueyo koda igi bende? ⁴¹To chiwuru
gima nie idis ne joma odhier, eka gik
moko duto biro bedunu maler.
⁴²Chandruok ochomou un Jo – Farisai,
nikech uchiwo ni Nyasaye mich mar
achiel kuom apar mar apoth gi odielo, kod
alode mamoko mag puodho, to ujwang'ö
ng'ado bura kare kod hero Nyasaye.
Owinjore utim gik machien-go, ka ok
uweyo mak utimo mokwongö.

⁴³Chandruok ochomou un Jo
– Farisai, nikech uhero kombe madongo
moloyo e sunagoke kod mos e chirmi.
⁴⁴Chandruok ochomou nikech uhalo gi
liete moumore ma ji wuotho kuomgi ka
ok ging'eyo.

⁴⁵Achiel kuom jal molony e chik nod-
woke ni, "Japuonj, ka iwuoyo kamano
wan bende iyanoyowa.

⁴⁶Yesu nodwoko ni "Un joma olony e
chik, bende chandruok ochomou nikech
umiyo ji ting' mapek maok ting'o yot
ngang', to un uwegi ok unyal konyogi
ting'ogi kata mana gi lith lwetu.

⁴⁷Chandruok ochomou, nikech ugero,
kendo umwono liete jonabi, to kwereu
ema nonegogi. ⁴⁸Omiyo ka utimo kamano
to koro unyiso ni uyie gi gima kwereu
notimo, ma ne ginegogo jonabi, to un to
koro umwono lietegi. ⁴⁹Kuom mano
Nyasaye e riekone nowacho ni, "Abiro
oronegi jonabi gi joote, kendo moko
kuomgi negi to moko ginisandi!
⁵⁰Emomiyo ibiro keto remb jonabi
mosechuer duto e wi tieng'ni nyaka aa
remb jonabi mosechwer aa chakruok piny.
⁵¹Chakre remb Habil nyaka remb
Zakaria, mane onegi e kind kendo mar
misango kod kama ler. Ee awachonu ni
tieng'ni ibiro kumo nikech mago duto.
⁵²Chandruok ochomou un joma
olony e chik, nikech usemayo ji kifungu
mar riekö. Un uwegi pok udonjo kendo
joma donjo be usegeng'onegi.

⁵³Ka Yesu noa kanyo, jo – Farisai gi
Jopuonj Chik nochako kwede gi gero
kendo ne gichande gi penjo mang'eny.
⁵⁴Ka girito mondo gimake gimoro amora
mane onyalo wacho.

Siem Kod Jip

12 E kindeno, kane oganda mar ji
mang'eny moromo alufe ne ose-
chokore, makoro ginyonore giwegi Yesu
nochako wuoyo mokwongö, gi jopuon-
jrene kowacho niya, "Ritreuru ka utang'
ni thowi mar jo- Farisai, ma en wuon-
druok. ²Onge gimoro mopandi maok bi

fwenyore, kata maling'ling' ma ok nong'ere. ³Gima usewacho e mudho biro winjore e odichieng' e lela, kendo gima usekwodho eitu ei ot maiye nolandi e wi tat ot.

⁴Awachonu osiepnā, kik uluor jogo manego ringruok to bang'e ok ginyal timo gimoro moloyo. ⁵To abiro nyisou jalo monego uluor: Luoruru jalno ma, bang' nego ringruok, to en gi teko mar witou e ataro mar mach. Ee, awachonu, luoreuru. ⁶Oyundi abich donge ing'iewo otonglo ariyo kende? To kata acheiel kuomgi wi Nyasaye ok wilgo. ⁷Chutho, kata mana yie wiu duto okwan. Kik uluor, nikech uloyo oyundi mang'eny.

⁸Awachonu, ng'ato ang'ata mahula e nyim ji, Wuod Dhano biro hule e nyim malaike mag Nyasaye. ⁹To ng'ato ang'ata mokweda e nyim ji en bende nokwede e nyim malaike mag Nyasaye. ¹⁰Kendo ng'at ang'ata mowacho wach marach kuom Wuod Dhano nowene, to ng'at mowach wach mar achaye kuom Roho Maler ok nowene.

¹¹"Kokelu e sunagogi, e nyim jodongo gi jotelo, to kik uparru kuom kaka dudwok weche ma odonjugo, kata gima duwachi, ¹²nikech Roho Maler biro puonjou e sano gima onego uwach.

Ngech Jomoko Mofuwo

¹³Ng'at moro mane ni ei oganda nowachone ni, "Japuonj nyis owadwa mondo opogna gikenwa.

¹⁴Yesu noduoko ni, "Omera ng'ama oketa jang'ad bura kata jathek e kindu?"

¹⁵Eka nowacho nigini, "Ritreuru! Beduru motang' ni kit wuoro duto; ngima mar dhano ok bedi ni mwandu mathoth ma en-go.

¹⁶Kendo nowachonigi ngero ni: puodh ng'at moro ma jamoko nochiek maber.

¹⁷Noparo e chunye ni, 'Ang'o monego atim? Aonge kama dakanie chamba.'

¹⁸"Mi nowacho, 'Ma e gima abiro timo. Abiro muko dechena kendo gero moko madongo, kendo abiro kano chamba duto

gi gigege kanyo. ¹⁹Eka anawach gie chunya ni "In-gi gigi mang'eny maber misekano moromi kuom higni mang'eny. Koro ywe, chiem, methi kendo bed mamor.

²⁰"To Nyasaye nowachone ni, 'In ng'ama ofuwoni! Kawuono gotieno ni ang' nokaw ngimani. Eka ng'ano mabiro kawo mago mise loso ni in iwuon?'

²¹"Mano e kaka nobed gi ng'ato ang'ata mokano gik moko ni en owuon to ok omew e yor Nyasaye.

Kik Iparri

²²Eka Yesu nowacho ni Jopuonjrene, "Emomiyo awachonu ni kik uparru kuom ngimau, kuom gima ubiro chamo, kata kuom dendu, kuom gima durwak.

²³Ngima duong' moloyo chiemo, dendi bende loyo lewni. ²⁴Paruru ane winy: Maok chwo bende ok gi kee, gionge gi kuonde keno kata dere; to Nyasaye pidhogi. To un donge uber moloyo winy. ²⁵To ng'ano kuomu manyalo medo saa achiel e ngimane nikech oparorore? ²⁶To kaka ok unyal timo mani matin-ni ang'o momiyo uparori kuom gik mamoko?

²⁷Paruru ane kaka odanyo dongo. Ok giti kata chwecho. To kata kamano awachonu ni kata mana Solomon e rwakruokne malich ok rom kodgi. ²⁸Ka kamano e kaka Nyasaye rwako lum man e pap, ma kawuono en tie to kiny iwite e mach, to koro un dorwaku, machal nade, yaye un man-gi yie matin. ²⁹Kendo kik uket chunyu kuom gima dicham kata madi madhi, kik uparru kuom mago. ³⁰Nikech joma ok oyie man e piny ringo kalawo gik ma kamago, Wuonu ong'eyo ni uchando gigo. ³¹To dwaruru piny ruodhe, eka magi bende biro medorenu.

³²Kik uluor un kweth matin, nikech Wuonu mor mar miyou piny ruoth.

³³Lok gigi iyudgo pesa mondo imi joma odhier. Dwaruru okepe maok yiechi, mwandu manie polo maok rum kuma jakuo ok chopie kata olwende ok keth.

³⁴Nikech kama mwanduni nitie ema

chunyi bende nitie.

Rito

³⁵"Rwakreuru kendo ikreuru ni tich bende techeu obed ka liel, ³⁶ka joma rito ruodhgi maduogo koa e nyasi mar arus, mondo kobiro kendo oduong' o to giyawone dhoot piyo. ³⁷Nobed maber ni jotich ma ruodhgi noyud karito e kinde moduogo. Awachonu adiera ni norwakre gi lawe mondo omigi chiemo, nomi gibed e mesa mi nobi mopognigi chiemo. ³⁸Nobed maber ni jotije ma ruodhgi noyud ka oikore kata ka obiro e arita mar ariyo kata mar adek gotieno. ³⁹To ng'euru ma maber ni kadine wuon ot ng'e saa ma jakuo biroe to dine ok oweyo ode otur gi jakuo. ⁴⁰Omiyo nyaka uikru, nikech Wuod Dhano biro biro saa ma ok ung'eyo."

⁴¹Petro nopenje, "Ruoth iwacho ngeroni ni wan koso ni ji duto?"

⁴²To Ruoth noduoko, "En ng'a maja adier kendo majatelo mariek ma ruodhe miyo tich mar rito jotije miyogi chiembgi e saa mowinjore?" ⁴³Jatijno none ber ka ruodhe oduogo moyude ka otimo kamano. ⁴⁴Awachonu adieri ni nokete mondo orit mwandune duto. ⁴⁵To ka jatich owacho e chunye owuon ni, 'Ruodha, okawo ndalo mathoth kapok oduogo', mi ochako goyo jotich machuo gi mon kendo ochako chiemo kendo gi metho, kod mer. ⁴⁶Ruodh jatijno nobi e odiechieng' maok opar ni dobie kendo e saa maok ong'eyo, obiro ng'ade matindo tindo mi nokete gi joma ok oyie.

⁴⁷Jatijno mong'eyo dwaro mar ruodhe to ok otem timo gima ruodhe dwaro nochwad mang'eny. ⁴⁸To mano maok ong'eyo to otimo gik mowinjore gi kum, to nochwad manok. Ng'ato ka ng'ato mose mi mang'eny nodwar kuome gik mang'eny, to jal mose mi mang'eny mondo oriti, enopenje mang'eny molooyo.

Ok Kuwe To Pogruok

⁴⁹"Asebiro mondo amok mach e-piny to mano kaka agombo ni mad ne bed ni osemoke! ⁵⁰Nitie batiso monego ayudi. To mano kaka chunya chandore nyaka chop otimre! ⁵¹Uparo ni ne abiro mondo akel kuwe e piny? Ooyo to awachonu ni ne akelo mana pogruok. ⁵²Chakre kavuono kadhi nyime ji abich ma joot achiel biro pogore, ji adek odok kon achiel to ji ariyo bende ni koma chielo. ⁵³Gibiro pogore, wuoro pogore gi wuode kendo wuowi bende pogore gi wuon, miyo nopogre gi nyare to nyako bende nopogre gi min, dayo nopogre gi chi wuode, chi wuowi bende nopogre gi damare.

Ng'eyo Tiend Kinde Mabiyo,

⁵⁴Nowacho ni oganda ni "Kuneno ka boche polo chokore yo podho chieng' to piyo piyo uwacho ni koth biro chwe, to timore kamano! ⁵⁵Kendo ka yamb milambo kudho to uwacho ni oro biro to kamano e kaka timore. ⁵⁶Andhokegi! Ka ulony kuom rango chal mar piny gi polo to ang'o momiyo ok unyal ng'eyo gik matimore ndalogi?"

⁵⁷Nikech ang'o ok unyal ng'eyo ngima kare? ⁵⁸Ka idhi gi ng'ama odonjoni e nyim jang'ad bura, tem matek mondo iwuo kode kendo uwinjru kapod un eyo, ka ok kamano to obiro ywayi koteri ir jang'ad bura, to jang'ad bura biro keti e lwet askari to askari biro boli e jela. ⁵⁹Awachoni ni ok niwuog oko nyaka ichul pesa duto.

Lokreuru Kata Ulal

13 Koro ne nitie jomoko mane nitie e kindeno mane owacho ni Yesu wach kuom Jo- Galili ma rembgi Pilato noruwo gi misenginigi. ²Yesu nodwoko ni, "Uparo ni Jo Galili-gi ne joricho molooyo Jo- Galili mamoko nikech negisandore kamano? ³Awachonu ni, "Ooyo! To ka ok ulokoru uweyo richou,

un bende duto unu tho kamano. ⁴Kata japar gaboro ka manotho kane ohinga e Silaom nopodho kuomgi- uparo ni negin joketho moloyo ji mamoko duto madak e Jerusalem? ⁵Awachonu ni, Ooyo! To ka ok ulokoru uweyo richou un bende ubiro manatho."

⁶Eka nogoyo ngeroni ni, "Ng'at moro ne nigi yadh ng'owo mopidho e puothe, to nodhiyo mondo orang olemo kuome, to ok noyudo mora amora. ⁷Omiyo nowacho ni ng'at mane rito puodho ni, "Kuom higni adek asebedo kabiro kae kadwaro olemo e ng'owoni to ok aseyo moro amora. Ng'ole igoye piny. Ere gima dimi ocham lowo?"

⁸Ng'atno nodwoke ni, "Jaduong', yie iweye higanu kende bang'e to abiro pure kendo medo ketone owuoyo. ⁹Ka onyago olemo higa mabiro, manober, to, ka ok onyago, to nong'ole oko."

Dhako Mong'ol Ochang Chieng' Sabato

¹⁰Chieng' Sabato moro Yesu ne puonjo e achiel kuom sunagoke, ¹¹to dhako moro ne nikanyo mane jachien osemiyo obedo mong'ol kuom higni apar gaboro. Midekre nodole maok nonyal riere tir kata matin. ¹²Kane Yesu onene, nolunge obi nyime kendo nowachone ni, "Dhako ogonyi ibed thuolo ichangi e midekreni." ¹³Eka noketo lwetene kuome, to gikanyono noriere tir kendo nopako Nyasaye.

¹⁴Jaduong' od lemo, mirima nomako nikech Yesu nochango dhakono chieng' Sabato, nowacho ni ji niya, "Nitie ndalo auchiel mitiyoe. Omiyo biuru mondo ochangu e ndalogo, to ok chieng' Sabato."

¹⁵Ruoth nodwoke ni, "Un joma wuondore! Donge ng'ato ka ng'ato kuomu gonyo rwadhe kata pundane e kul kotere oko mondo omiye pi? ¹⁶Koro dhakoni, ma nyakwar Ibrahim, ma Satan oseketi kotweyo higni apar gaborogi mabor kama donge ber kogonye obed thuolo chieng' Sabato oa e gima notweye?"

¹⁷Kane owacho mani, jogo duto mane pinge wigi nokuot. To ji mamoko nomor kod gik moko duto miwuoro mane otimo.

Ngero Mar Koth Karadali Kod Thowe.

¹⁸Eka Yesu nopenjo, niya, "Ere kaka loch pinyruodh Nyasaye chalo? Ang'o madapimego? ¹⁹Ochalo kod koth karadali, ma ng'ato nokawo kendo opidho e puothe. Nodongo moped yien, to winy mag polo nogedo e bedene."

²⁰Nopenjo kendo ni, "Ang'o ma dapimgo loch pinyruodh polo mar Nyasaye? Ochalo thowi ma dhako ²¹kawo kendo oruwo ei mogo mang'eny, mi bang'e okuot.

Dhoot Madiny

²²Eka Yesu nodhiyo e taonde kod gwenge kopuonjo ji ka odhiyo Jerusalem. ²³Ng'ato moro nopenjo niya, "Ruoth, en mana ji manok emabiro kwo?"

Nowacho nigi ²⁴"niya Temuru matek mondo udonj e dhoot madiny, nikech awachonu ni, ji mang'eny biro temo mondo odonj to ok gibi nyalo ngang'. ²⁵Ka wuon ot nochung' kendo lor dhoot ubiro chungo oko ka uduong'o kendo sayo ni, 'Jaduong', yawnwa dhoot.'

"To obiro dwokou ni, 'Ok ang'eyou kata kuma uae akia!'

²⁶"Eka ubiro wacho ni, "Ne wachiemo kendo metho kodi, bende ne ipuonjoe yorewa matindo.'

²⁷"To obiro dwoko ni, 'Ok ang'eyou, kata kuma uae akia. Ayeuru kuoma un jomatimo maricho!" ²⁸"Ywagruok biro bedo kanyono, kod muodo lak, ka uneno Ibrahim, Isaka gi Jakobo gi jonabi duto manie Pinyruoth Nyasaye to un uwegi nowitu oko. ²⁹Ji, biro biro koa yo wuok chieng' kod yo podho chieng', gi nyadwat kod milambo, kendo gi bed e keregi e kar nyasi mar chiemo e Pinyruoth Nyasaye. ³⁰Adiera chutho nitie jomoko makoro nichien mabiro telo, to jomotelo mabiro dong' chien."

Chuny Malit Mar Yesu Ni Jerusalem

³¹Gi e kindeno Jofarisai moko nobiro ir Yesu kendo nowachone ni, "Ai ka kendo dhiyo kamachielo nikech Herode dwaro negoi."

³²Nodwoko ni, "Dhiuru uwachne kibweno, 'Abiro golo jochiende kendo chango ji kawuononi gi kiny, to chieng' mar adek abiro chopo dwarona. ³³To kata kamano nyaka adhi nyime kawuononi, gi kiny kod orucha nikech adiera onge, janabi ma nyalo tho oko mar Jerusalem!

³⁴"Yaye, Jerasalem, Jerusalem, biro nego jonabi kendo chielo gi kite jogo moor iri, didi, masedwaroe mondo achok nyithindi kaachiel, mana kaka gweno choko nyithinde e bwombe, to ok useyie. ³⁵Ne, odi odong' gunda. Awachoni, ok ininena kendo nyaka iniwach ni, "Ogwedh ng'ama biro e nying Ruoth.' "

Yesu E Od Jafarisai.

14 Chieng' Sabato moro, kane Yesu odhiyo chiamo e od Jafarisai marahuma moro, nobedo ka ne ing'iyeh ahinya. ²To e nyime kanyo netie ng'ato mane mbunda ohingo. ³Yesu nopenjo Jafarisai kod jomolony e chik ni, "En gima owinjore gi chik mondo ochang ng'ato chieng' Sabato koso? ⁴To ne giling' thi. Eka nokawo ng'atno, nochange kendo noweye odhi.

⁵Eka nopenjogi ni, "Ka ng'ato kuomu nigi wuede kata rwadhe mopodho e soko chieng' Sabato, donge diywaye igole oko mana gikanyono? ⁶To negionge gima digiwachi.

⁷Kane oneno kaka welo yiero kuondegi mag bet moyiedhi, e kar mesa, nogoyo nigi ngeroni ni, ⁸"Ka ng'ato oluongu e nyasi mar kiseru to kik ibed e kom moyiedhi, nimar dipo ka ng'ato moro mogen moloyoi oluongi bende. ⁹Eka ka ng'ama oluongu ji ariyogi ka obiro mowachoni ni, 'Mi jali komi.' Kamano eka wiyi nokuodi nyaka inidhi ikaw kom kar bet man chien moloyo. ¹⁰To ka oluongu e nyasi moro mar

kiseru kamoro to bed mana e kom man chien moloyo, mondo ka ng'at moluongino obiro to obiro wachoni ni, 'Osiepa, sudi malo nyime kama berni! Kamano iniyud luor e nyim welo wetini duto." ¹¹Nimar ng'ato ang'ata mat-ing'ore malo nodwok piny, to jalo madwokore piny noting' malo."

¹²Eka Yesu nowacho ni ng'at mane oluongu ni, "Ka ichiwo chiemb odiechieng' kata chiemb otieno, kik iluong mana osiepeni, oweteni kata wedeni, kata jogweng'u momew, nimar ka itimo kamano, kamoro giniluongi chieng' moro, mi gichuli kar luong mane iluongigono. ¹³To ka iloso nyasi, iluong joma odhier, rang'onde gi pudhe kod muofni, ¹⁴eka ibiro gwedhoi kata obedo ni ok ginyal chuloi, to nochuli chieng' chier mar jomakare."

Ngero Mar Nyasi Maduong'

¹⁵Ka achiel kuom jogo mane ni kode e mesa nowinjo ma, nowacho ni Yesu ni, "Ogwedhi nga'tono mabiro chiamo e nyasi mar Pinyruoth Nyasaye."

¹⁶Yesu nodwoke ni, "Ng'at moro ne oloso nyasi maduong' kendo noluongo welo mang'eny. ¹⁷Gi e kindeno mar nyasi nooro jotichne mondo onyisi jogo mane oluongi, 'Biuru, nikech gik moko duto koro oseikore.

¹⁸"To giduto machalre ne gichako wacho weche ma ginyisogo wuon nyasi gimomiyo ok ginyal biro. Jal mokwongo nowacho ni, 'Koro eka aseng'iewo puodho moro, to nyaka adhi mondo anene. Yie ing'wonna.

¹⁹Jal machielo nowacho ni, "Koro eka ang'iewo joge abich mag rweth pur, to adhiyo mondo atemgi, yie mondo ing'wonna.

²⁰Jal machielo pod nowacho bende ni, 'Eka aa kendo, omiyo ok anyal biro.'

²¹"Jatich nodwogo kendo nowacho kamano ni ruodhe. Eka wuon ot nobedo mager kendo nowacho ni jatichne niya, 'Wuogi idhi mapiyo e yore matindo kod e

kuonde mopondo mag taon mondo ikel joma odhier gi rang'onde, muofni kod pudhe.'

²²Jatich nowacho ni, 'Jaduong' gima nende ichokowa osetim, to pod thuolo nitie.'

²³"Eka jaduong' nowacho ni jatichne ni, 'Wuogi idhiyo oko e yore madongo kod yore mag gweng' kendo ikel gibi gidonji, mondo oda opong'. ²⁴Awachonu ni, onge kata ng'ato achiel kuom jogo mane oluongo manobil chiamba.'"

Nengo Mar Bedo Japuonjre Yesu

²⁵Ka ji mang'eny ne wuotho kod Yesu, eka nolokore irgi mowachonigi niya: ²⁶"Ka ng'ato obiro ira, to ok okwedo wuon gi min kod chiege gi nyithinde, owete gi nyiminene ee, kata ngimane owuon- ok onyal bedo japuonjrena. ²⁷To ng'ato maok oting'o msalape owuon mi oluwa ok onyal bedo japuonjrena.

²⁸"Ka dibed ni achiel kuomu dwaro gero ohinga. Donge obiro bedo piny mokwongo mondo okwan nengone mondo one ka en gi pesa moromo mar tieke? ²⁹Nimar ka oketo mise to ok onyal tieke, ji duto manene biro nyiere, ³⁰ka giwacho ni, "Jali nochako gedo to ok onyal tieko."

³¹"Kata ka dibed ni ruoth moro dwaro dhiyo e lweny e kinde gi ruoth machielo. Donge mokwongo dobed piny mondo opar anena ka ji alufu apar ma en-go bende onyalo kedogo gi jal mabiro monje man-gi ji alufu piero ariyo? ³²Ka ok donyal, to obiro oro joote ka pod jal machielo pod ni kuma bor, mondo onyise ni odwaro mondo giwinjre e yor kuwe. ³³Machalre kamano bende, ng'ato kuomu maok oweyo gige duto ok onyal bedo japuonjrena.

³⁴"Chumbi ber, to ka ndhathe orumo, ere kaka dimiye obed gi ndhadhu kendo? ³⁵Ok owinjore ne tich lowo kata mana pidh owuoyo, omiyo ipuke oko.

"Ng'at man gi it mar winjo, mondo owinji."

Ngero Mar Rombo Molal

15 Koro josol osuru gi "joricho" nochokore machiegni mondo giwinje. ²To jo- Farisai gi Jopuonj Chik neng'ur kawacho ni, "Ng'atni rwako joricho kendo ochiemo kodgi."

³Eka Yesu nogoyo nigi ngero ni: ⁴"Ka ng'ato kuomu dibedi ni nigi rombe mia achiel, to olalo achiel kuomgi. Donge dowe piero ochiko gochiko e pap kama ler kendo odhi omany rombo molal nyaka oyude? ⁵To ka oyude, okete e goke komor. ⁶kendo odhiyo dala. Eka oluongo osiepena gi jogweng'gi kaachiel, kowacho ni, "Monuru koda, Aseyudo nyarombona mayandi olal. ⁷Awachonu ni kamano e kaka mor nobedi e polo kuom jaricho achiel molokore, molooyo mor kuom ji piero ochiko gochiko mabeyo maok dwar lokruok.

Ngero Mar Pesa Molal

⁸"Kata ka dibed ni nitie dhako man-gi silinge mamingli apar, to achiel olalne. Donge domok taya, kendo yweyo ot to omany maber ahinya mondo oyude? ⁹To ka oyude, oluongo osiepena gi jogweng'gi kaachiel, kowacho ni, 'Moruru koda, aseyudo pesana manolal.' ¹⁰Mana kamano, awachonu e kaka mor e nyim malaika mag Nyasaye nobedie kuom jaricho achiel molokore."

Ngero Mar Wuowi Molal.

¹¹Yesu nomedo wacho niya, "Ne nitie ng'ato moro mane nigi yawuowi ariyo. ¹²Wuowi machogo nowacho ni wuon mare ni, 'Wuora, pogna mwanduna ma mara, kuom mano nopogo yawuote ariyogo mwandune.

¹³"Bang' ndalo manok ne mano, wuowi machogo nokawo gige duto, eka nowuok modhiyo e piny mabor to kuro notiyo gi mwandune e yor dak e ngima mar anjawa. ¹⁴Kane osetieko gik moko duto, kech mager nowuok e pinyo duto, eka nochako bedo gi chando. ¹⁵Eka nodhiyo kochiwore owuon mondo oti ni

japinyo, mane oore e lawe mondo opidh ne ngurue. ¹⁶Nogombo mondo ocham opong'go iye opokla ma ngurue chamo, to bende onge ng'ato mane omiye gimoro.

¹⁷Kane parone oduogone, nowacho niya, 'Gin ji adi mondiki mag wuora mangi chiemo moromogi, madong'. To an ka eri kech chama mar tho! ¹⁸Abiro wuok kendo adog ir wuora mi anawache ni: Wuora, asetimo richo e nyim polo kendo e nyimi. ¹⁹Ok awinjora koro oluonga ni wuodi; keta abed kaka achiel kuom jotich-ni. ²⁰Omiyo noa malo kendo nodhiyo ir wuon mare.

"To kane pod en kuma bor, wuon mare nonene kendo kopong' gi kech kuome, noringo kodhiyo ir wuode, nokwake gi bade kendo nonyodhe.

²¹Wuwino nowachone niya, 'Wuora, asetimo richo e nyim polo kendo e nyimi. Ok awinjora koro mondo oluonga ni wuodi.'

²²To wuon mare nowacho ni jotichne niya, 'Piyo piyo, keluru law maberie molooyo mondo urwakne. Ketneuru tere e lith lwete kendo wuoche mondo urwakne e tiendene. ²³Keluru nyarwath machwe uyang'. Wachamuru wabed mamor. ²⁴Nikech wuodani yande otho, to koro onwang'e.' Kamano negichako timo nyasi ka gimor. ²⁵E kindeno, noyudo ka wuowi maduong' nie puodho. Kane obiro machiegni gi ot nowinjo wer gi miel. ²⁶Omiyo noluongo achiel kuom jotich kendo nopenje ni en ang'o matimore. ²⁷Nodwoke ni, 'Owadu oseduogo, to wuoru osenego nyarwath machwe nikech oseduogo kongima kendo maber.'

²⁸To wuowi maduong' mirima nomako, kendo notamore donjo e ot. Omiyo wuon mare nowuok oko odhiyo ire kendo nosaye mondo odonji. ²⁹To nodwoko wuon mare niya, 'Neye, higin gi duto asebedo katiyoni ka misumba kendo aserito katimo chikeni. To eka pok imiyoa kata mana nyadiel mondo ayang', abedgo mamor kod osiepena.' ³⁰To ka wuodi ni, moseketho gige gi mon ma

jochode ka obiro dala, to inegone nyarwath machwe!' ³¹Wuon mare nowachone niya, 'Wuoda, in koda ndalo duto, kendo gik moko duto ma an-go' gin magi. ³²To nyaka ne wabed mamor kendo bed moil, nikech owaduni yande otho to koro ongima, kendo yande olal to koro oyude! "

Ngero Mar Wuon Tich Mariek

16 Yesu nowacho ne Jopuonjrene niya. "Ne nitie jamoko moro, ma ng'at mane rito mwandune ne odonjine ni ketho gige. ²Omiyo noluonge ire kendo nopenje ni, 'En ang'o mawinjo kuomi ni? Chiw ane kwan kuom gigo duto mirito, nikech ok inyal bedo jarit giga kendo ngang'!"

³Jarit nowachone en owuon ni, 'Abiro timo ang'o koro? Ruodha koro maya tija. Ok an ratego moromo ma dapur, to wiya kuot mondo akwechi. ⁴Ang'eyo gima abiro timo, ma ka aweyo tich ka to ji biro rwakae utegi!"

⁵Omiyo noluongo jogope ruodhe achiel achiel. Nopenjo mokwongo ni, 'In-gi gop ruodha maromo nadi?"

⁶Nodwoke ni, 'Galande mia aboro mag mo. Jarit tich nowachone ni, 'Bed piny piyo piyo, ikaw kitapi indikie ni, mia ang'wen.'

⁷Eka nopenjo jal mar ariyo ni, 'In to, gopi oromo adi?' Nodwoke ni, 'Gunde alufu mag ngano.'

"Nowachone ni, 'Kaw kitapini, indike ni mia aboro.'

⁸Ruoth nopako Jarit gige maok kareno nikech notiyo gi rieke. Nimar jopinyni ong'eyo tiyo mariek gi jowadgi molooyo jogo mag chieng'. ⁹Awachonu ni, tiuru gi mwandu mag piny mondo umakgo osiepe ne un uwegi, mondo ka orumo, norwaku e kar dak manyaka chieng'.

¹⁰Ng'at minyalo geno gima tin inyal gene bende gi gik mang'eny ma to ngat ma ok jadera gi gima tin bende ok nyal gadera gi gik mang'eny. ¹¹Emomiyo ka ok usebedo joadiera e tiyo gi mwandu

mar pinyini, ngano mabiro genou gi mwandu madier?¹²To ka ok usebedo joadiera gi mwandu ng'at machielo, ng'ano madimiu mwandu ma maru-uwegi?

¹³"Onge jatich manyalo tiyo ni ruodhi ariyo. Nimar obiro sin gi achiel to ohero machielo, kata obiro chiwore ni achiel to ochayo machielo. Ok inyal tiyo ni Nyasaye kendo ni Pesa."

¹⁴Jo- Farisai mane ohero pesa nowinjo magi duto kendo neginyiero kagijaro Yesu. ¹⁵Nowachonigi ni, "Un ema uke-toru kare uwegi e wang' ji, to Nyasaye ong'eyo chunyu. Gima okaw ni ber ahinya gi ji, kuom Nyasaye en gima ichayo.

Puonj Mamoko

¹⁶"Chik kod Jonabi nolandi nyaka chop ndalo mar Johana. Chakre kanyo, wach maber mar Pinyruodh Nyasaye osebedo kilando, kendo ng'ato ka ng'ato riyore mondo odonjie. ¹⁷To yot mondo polo gi piny orum, molooyo ka nukta achiel matinie molooyo mar chik ok lal.

¹⁸"Ng'ato moriembo chiege kendo okendo dhako machielo, otimo tim chode, to ng'at mokendo dhako ma chwore oriembo, to en bende otimo tim chode.

Jamoko Kod Lazaro

¹⁹"Ne nitie jamoko moro mane rwako lewni mokikore kendo mareprep mabeyo ma nengogi tek, kendo nodak e ngima mamalo mar mor ndalo duto. ²⁰E dho-rangaye noketie jakwecho miluongoni Lazaro, ma adhonde nopong'o dende ²¹kendo nogombo chamo ng'injo molwar e bwo mesa jamokono. Kata mana guugi bende nobiro minang' adhondege.

²²"Saa nochopo ma jakwecho notho kendo malaika noting'e, otere e bath Ibrahim. Jamoko bende notho kendo noike. ²³Kane en e Piny Joma otho kisande malit, nong'yo malo to noneno Ibrahim gi kuma mabor kod Lazaro e bathe. ²⁴Omiyo noluonge kowacho niya,

'Wuora Ibrahim kecha kendo or Lazaro olut lith lwete e pi mondo okwena lewa, nikech an-gi rem malit e ligegani.'

²⁵"To Ibrahim nodwwoke ni, 'Wuoda, parie ni e ndalo mar ngimani ne iyudo gik mabeyo, ka Lazaro to ne yudo gik mari-cho, to koroni oneno maber ka eri, to in inie rem malit. ²⁶To bende molooyo ne mano duto, e kindwa kodi nitie hoho mang'ongo moseketi, mondo otam jogo madwaro aa ka obi iru kata ng'ato ok nyal ng'ado oa koru obi irwa koni.

²⁷"Nodwoko ni, 'Koro akwayoi, wuora, or Lazaro odhi od wuora, ²⁸nimar an-gi owetena abich. Odhiyo osiemgi, mondo kik gin bende gibe e kar sand malitni.'

²⁹"Ibrahim nodwoke ni, 'Gin kod Musa gi Jonabi, owinjore gi winjigi.'

³⁰"Nowacho ni, 'Ooyo wuonwa Ibrahim, to ka ng'ato oa kuom joma otho modhi ir gi, ginyalo lokore.'

³¹"Nowachone ni, 'Ka ok ginyal winjo Musa gi Jonabi, ok ginyal yie winjo kata ng'ato chier aa kuom joma otho.' "

Richo, Yie, Tich

17 Yesu nowacho ni jopuonjrene niya, "Gik mamiyo ji timo richo ochunore ni nyaka bedie, to okuong' jalo makelo gigo. ²Da obedo maber ka otwene pong' e ng'ute, ni onyumego e nam molooyo komiyo achiel kuom jomatindogi otim richo. ³Omiyo ritreuru uwegi,

"Ka owadu otimo richo, kwere, to ka olokore, wene. ⁴Ka otimoni richo nyadibiriyo odiechieng' achiel to obiro iri nyadibiriyo kendo owacho ni, 'Alokora, wene.'

⁵Joote nowacho ni Ruoth niya, "Med yiewa."

⁶Nodwoko ni, "Ka un gi yie matinie kaka koth karadali, unyalo wacho ni yadh ng'owoni ni pudhri i mondo ipithri e nam' to da owinjow motimo kamano.

⁷"Ka dibud ni nitie achiel kuomu mangi jatich mapurone kata makwayo rombe. Dowachne jatichne koa e puodho ni, "Bi koroni kendo ibed piny mondo ichiem?"

⁸Donge dowachne mana ni, losna chiemba mar otieno, ikri mondo imiya acham kendo madho, eka bang'e inyalo chiemo kendo metho? ⁹Dogo ni jatichneno erokamano nikech notimo gima nowachone notim? ¹⁰Omiyo un bende, ka usetimo gik moko duto maneonyisu mondo utim, onego uwach ni, wan mana jotich aticha ma ok owinjore wasetimo mana tichwa."

Jodhoho Apar Ochangi.

¹¹Koro e yo kane odhiyo Jerusalem, Yesu nowuotho e kind Samaria gi Galili.

¹²Ka noyudo odonjo e dala moro, ji apar man-gi dhoho noromo kode. Negichungo mabor ¹³kendo negiluongo gi duol maduong' ni, "Yesu, Ruoth! Kechwa!"

¹⁴Ka nonenogi, nowacho niya, "Dhiuru, unyisru uwegi ni jodolo." To kane gidhi, negipuodhore.

¹⁵Achiel kuomgi, kane oneno ni osechange, nodok ir Yesu, kopako Nyasaye gi duol maduong'. ¹⁶Nogore piny e tiend Yesu kendo nogoyone erokamano- to ne en ja Samaria.

¹⁷Yesu nopenjo ni, "Donge ji apar duto nopuodhi? Ere ji ochiko mamoko?"

¹⁸Onge ng'ato madineyudre kuomgi monego duogi mondo omi Nyasaye pak, mana japiny moro nononi kendo ema oduogo? ¹⁹Eka nowachone niya, "Chungu kendo idhi, yieni osemiyo ibedo mangima."

Biro Mar Pinyruoth Nyasaye

²⁰Chieng' moro, kane openje gi jo-Farisai kinde ma pinyruodh Nyasaye nobiye, Yesu nodwokogi ni, "Pinyruodh Nyasaye ok bi mana kaka uparoe ka uneno, ²¹kata ji ok nowach ni, Eri go, kata ni, Ee cha go cha, nikech pinyruodh Nyasaye nie eiu."

²²Eka nowacho ni jopuonjre ni, "Ndalo biro ma unugomb nenoe chieng' achiel kuom ndalo mag Wuod Dhano, to ok ununene. ²³Ji biro wachonu ni, En kucha! Kata ni, En ka, kik uring udhi bang'gi. ²⁴Nikech ndalo mar Wuod Dhano nobed

machalo ka mil polo ma piatore e kor polo koa konchiel nyaka komacheilo. ²⁵To mokwongo nyaka one masiche mang'eny, kendo tieng'ni nodage.

²⁶"Mana kaka ne en e ndalo mag Nowa, e kaka biro bedo bende e ndalo mag Wuod Dhano. ²⁷Ji ne chiemo kendo metho, chwo ne kendo bende nyiri ne ikendo nyaka nochopo chieng' ma Nowa nodonjo e yie. Eka pi mar ataro nobiro motieko ji duto.

²⁸Kamano e kaka nechalre e ndalo mag Lut, ji ne chiemo, kendo metho, ne gingiewo kendo negiloko ohala, bende negipitho kendo gedo. ²⁹To chieng' mane Lut oa Sodom, mach kod kite maliel mager nolwar koa e polo kendo notiekogi duto.

³⁰Kamano kaka obiro bedo e ndalo ma Wuod Dhano nofwenyre. ³¹Odiechieng'no onge ng'ato manobedie e wi tat ot, man-gi gige ei ot, manolor mondo ogolgi. Machalre gi mano, onge ng'ato manie puodho manodog dala ne gi moro amora. ³²Paruru chi Lut! ³³Ng'ato matemo reso ngimane, ngimane biro lalne, to ng'atno ma ojwang'o ngimane, nores ngimane. ³⁴Awachonu ni, otienono ji ariyo nobed e otanda achiel: achiel ibiro kawo to machielo nowe. ³⁵Mon ariyo biro bedo karego cham kaachiel, achiel nokaw, to machielo nowe. ³⁶Chwo ariyo nobed e puodho, achiel ibiro kawo, to machielo nowe."

³⁷Eka negipenje niya, "Mano notimre kanye, Ruoth?"

Nodwokogi ni, "Kama ringruok motho nitie, ema achudhe chokore."

Ngech Chi Liel Mamien.

18 Eka Yesu nogoyo ngero ni jopuonjrene mondo onyisgi gibed ka gilamo kinde duto kendo kik chuny gi aa. ²Nowachonigi niya, "E taon moro ne nitie jang'ad bura mane ok oluoro Nyasaye kata ok odewo ji. ³To ne nitie chi liel moro e taondno mano bedo kadhiyo

ire pile gi ywakne kakwaye ni, 'Yie ing'ad-na bura e kinda gi jal mahinyani!

⁴Kuom kinde moko moromo nodagi, to bang'e mogik nowacho kende owuon ni, kata obedo ni ok aluoro Nyasaye kendo ok adewo ji kamano ⁵to nikech chi lielni osiko chanda, abiro neno ni ang'adone bura kare, mondo kik ojoga oola gi birone ira pile!"

⁶To Ruoth nowacho niya, "Winjeuru gima ne jang'ad bura maok kareno owachol!⁷To donge Nyasaye biro ng'ado bura kare ni joge moyier, maywakne odiechieng' gi otieno? Obiro tamore maok owinji koso? ⁸Awachonu ni, obiro neno ni ong'adnigi bura kare kendo mapiyo. Kata kamano, ka Wuod Dhano biro, bende obiro yudo yie e piny?"

Ngero Mar Ja Farisai Gi Jasol Usuru.

⁹Ni joma nogenore giwegi ni gin jomakare kendo mane ochayo ji mamoko duto, Yesu nogoyo nigi ngeroni ni: ¹⁰"Ji ariyo nodhiyo lemo ei hekalu, achiel ne en ja-Farisai to machielo ne jasol osuru. ¹¹Ja Farisai nochungo kendo lamo kuome owuon niya: "Nyasaye, agoyoni erokamano ni ok an kaka ji mamoko – ma jomecho, jomatimo maricho, jochodekata mana kaka jasol osuruni. ¹²Ariyo kech maok achiem diriyo e juma ka juma, kendo achiwo achiel kuom apar mar gigo duto manwang'o. ¹³To jasol osuru nochungo mabor. Ne ok onyal kata mana ng'iyi polo malo, to nogoyo kore kendo nowachoni, Nyasaye, kecha an jaricho.

¹⁴Awachonu ni ng'atni, maok ng'at machielono, nodhiyo dala ka en kare e nyim Nyasaye. Nikech ng'ato ka ng'ato mating'ore malo owuon nodwoke piny, to ng'at madwokore piny noting' malo.

Nyithindo Matindo Gi Yesu

¹⁵Ji nekelo nyithindo matindo ir Yesu, mondo omulgi. Kane jopuonjrene noneno mano negikwerogi. ¹⁶To Yesu noluongo nyithindo ire kendo nowacho ni, " Weuru nyithindo matindo obi ira,

to kik utamgi, nikech pinyruodh Nyasaye en mar jo-machal ka magi. ¹⁷Awachonu adiera ni, ng'ato ma ok orwako pinyruodh Nyasaye kaka nyathi matin ok onyal donjoe."

Jamoko Ma Ruoth

¹⁸Ruoth moro nopenje ni, "Japuonj maber, en ang'o manyaka atim mondo acham ngima manyaka chieng'?"

¹⁹Yesu nodwoke ni, "Ang'o momiyu iluonga ni ng'ama ber? Onge ng'ama bermakmana Nyasaye kende. ²⁰Ing'eyo chike ni, ' Kik iterri, kik ineki, kik ikwal, kik ihang wach kendo ni luor wuoru gi meru."

²¹Nodwoke ni, "Magi duto ne aserito nyaka aa rawera."

²²Ka Yesu nowinjo ma, nowachone ni, " Pod irem gimoro achiel. Lok gigi duto ma in-gob pesa, mondo ipog joma odhier, eka inibed gi mwandu e polo. Eka iduog iluwa."

²³Kane owinjo ma, nobedo mokuyo ahinya, nikech ne en ng'at ma jamoko maduong'. ²⁴Yesu nong'iyi kendo nowachone ni, "Mano kaka tek ni joma nigi mwandu donjo e pinyruoth Nyasaye. ²⁵Chutho, yot ni ngamia kadho e wang' sandan, molojo jamoko donjo e pinyruoth Nyasaye.

²⁶Jogo manowinjo mani nopenjo ni, " En ng'ano kare manyalo kwo?"

²⁷Yesu nodwokogi ni, "Gino maok nyalre gi dhano, nyalore gi Nyasaye.

²⁸Petro nowachone ni, "Waseweyo gik moko duto, ni nyaka waluwi!"

²⁹Yesu nowachonigi ni, "Awachonu adier ni, onge ng'ato moseweyo dalane kata jaode gi owetene, kata jonyuolne, kata nyithinde nikech piny ruoth Nyasaye³⁰ok norem mak oyudo nyadi mang'eny marome e tieng'ni kendo e tieng' mabiro, noyud ngima manyaka chieng'.

Yesu Ochako Okoro Kendo Kuom Thone.

³¹Yesu nokawo Jiapar gariyo tenge

kendo nowachonigi niya, "Wadhiyouru nyaka Jerusalem, to gigo duto maneondiki gi jonabi kuom Wuod Dhano ibiro timogi. ³²Ibiri chiwe ni joma ok jo-Yahudi. Gibiro jare, giniyanye, ka ging'ulo olaw kuome, kendo ginichwade ma gininege. ³³To enochier kendo chieng' mar adek,"

³⁴Jopuonjre ne ok owinjo tiend wehegi moro amora. Tiende nopandnigi, kendo ok ne ging'eyo gima ne owuoyo kuome.

Jakwecho Ma Muofu Oneno

³⁵Ka Yesu nesudo machiegni gi Jeriko, ng'at moro mamwofu nobedo piny e bath yo ka okwecho. ³⁶Kane owinjo ka oganda kadho, nopenjo ni en ang'o matimore. ³⁷Negidwoke ni, "Yesu ja- Nazareth ema kadho."

³⁸Noluongo matek ni, "Yesu, Wuod Daudi, kecha!"

³⁹To jogo manotelo e yo nokwere kendo nowachone ni ling' thi, to nomedo goyo koko ni, "Wuod Daudi, kecha!"

⁴⁰Yesu nochungo kendo nochiko mondo okel ng'atno ire. Kane obiro machiegni, Yesu nopenje ni, ⁴¹"Ang'o midwaroa mondo atimni?" Nodwoko ni, "Ruoth, adwaro mondo anen."

⁴²Yesu nowachone ni, "Nen! Yieni ema ochangi." ⁴³Gikanyono wang'e noyepo moneno kendo noluwo Yesu, kopako Nyasaye. Ka ji duto noneno mano, ne gipako Nyasaye.

Zakayo Jasol Osuru

19 Yesu nodonjo Jeriko kendo nowuotho kokadho. ²Ng'ato ne nitie kanyo ma nyinge Zakayo; ne en jasol osuru maduong' kendo ne en jamwandu ³Ne odwaro neno ni Yesu en ng'a, to nikech ne en nyadundo ne ok onyal, nikech oganda. ⁴Omiyo noringo dhiyo motelo kendo noidho yadh ng'owu mondo onene, nikech Yesu ne biro kuro.

⁵Ka Yesu nochopo kanyono, nongiyo malo kendo nowachone ni, "Zakayo, lor

piny piyo. Tinendeni nyaka abed e odi." ⁶Omiyo Zakayo nolor mapiyo kendo norwake gi mor.

⁷Ji duto noneno ma to kendo negichako ng'ur, kagiwacho ni, "Osedhi bedo wendo jaricho!"

⁸To Zakayo nochungo malo kendo nowacho ni Ruoth niya, "Ne Ruoth! Sani kendo koroni nus mar giga ni jochan, to kapo ne asewuondo ng'ato e gimoro amora, abiro chule kaduokone maromo nyadi ng'wen."

⁹Yesu nowachone niya, "Kawuono warruok osebiro e odni, nikech jali bende en nyakwar Ibrahim. ¹⁰Nikech Wuod Dhano nobiro mondo omany kendo owar mano manolal."

Ngech Siling' Alufu Achiel, Achiel

¹¹Kane pod giwinjo mani, nodhiyo nyime kogoyonigi ngero, nikech nochiegini gi Jerusalem, kendo ji neparo ni pinyruoth Nyasaye biro betie mapiyo. ¹²Nowacho niya, "Ng'at moro marahuma nodhiyo e piny maber mondo oyiere ruoth kendo eka oduogi. ¹³Omiyo noluongo jotichge moko apar kendo ne omiyogi siling' alufu achiel, achiel. Nowachonigi niya, "Keturu pesagi e tich, nyaka aduogi."

¹⁴To joge nosin kode kendo negiyo joote modhiyo ire mondo giwach ni, "Ok wadwar ng'atni mondo obed ruodhwa.

¹⁵Kata kamano, ne okete ruoth, kendo nodok dala. Kendo noluongo jotichne mane omiyo pesa, mondo oyud ni en ohala manade magise yudo.

¹⁶Ng'at mokwongo nobiro kendo nowacho niya, "Jaduong' siling' alufu achiel, osenywolo silinge alufu apar moko.

¹⁷Ruoth nodwoko niya, "Otimore maber, jatichna maber! 'Nikech isebedo ng'at mogen e gima matin ahinya, koro bed ruodh mier madongo apar.

¹⁸Ng'at mar ariyo nobiro kendo nowacho niya, 'Jaduong', siling' alufu achiel osenywolo silinge alufu abich moko.

¹⁹Ruodhe nodwoke niya, 'Bed ruodh mier madongo abich.

²⁰Eka jatich machielo nobiro kendo wacho niya, 'Jaduong', siling' alufu achiel eri, nasekane kapande aboyogo gi nanga.

²¹Ne aluori, nikech in ng'at makoch. In ikawo gino mane ok ikano, kendo ikayo mano mane ok ichwoyo.

²²"Ruodhe nodwoke niya, 'Abiro ng'adoni bura koluwoke kod wachni, in jatich marach! Kara in ne ing'eyo ni an nga't makoch, kendo ni akawo gima ne ok akano, bende akayo gima ne ok achwoyo!

²³Marang'o ne ok iketo pesanano e bengi, mondo kane aduogo, to ne anyalo kawe kod ohala.

²⁴"Eka nowacho ni jogo manochungo kanyo niya, " Kawuru silinge alufu achiel ugol kuome kendo umi jalno man-gi siling' alufu apar."

²⁵"Negiwacho niya, 'Jaduong' donge en-gi siling' alufu apar.'

²⁶"Nodwoko niya, "Awachonu ni ng'ato ka ng'ato man-go, ibiro medo mathoth, to jalo ma onge go, kata mano ma en-go nomaye. ²⁷To wasikago mane ok dwar mondo abed ruodhi gi – kelgiuru ka kendo neggiuru e nyima."

Donjo Gi Loch Marahuma

²⁸Bang' ka Yesu nosewacho mani, nodhiyo nyime, kodhiyo malo e Jerusalem.

²⁹Ka nosudo machiegni gi Bethfage kod Bethania e got miluongo ni Got Zeituni, nooro Jopuonjrene ariyo, nowachonigi niya, ³⁰" Dhiuru e dala man nyimu cha, to kaka udonjo e iye, ubiro yudo nyathi kanyina motue. Gonyeuru kendo ukele ka.

³¹Ka ng'ato moro openjou ni, 'Ang'o momiyu ugonye ? Uwachne ni, Ruoth dware."

³²Jogo maneeor motelo nodhiyo kendo negiyude mana kaka nosenyisogi ³³Kane oyudo gigonyo nyathi kanyano, wuon nopenjogi, " Ang'o momiyu ugonyo nyathi kanyana?"

³⁴To jopuonjre noduoke mayot ni, 'Ruoth dware,"

³⁵Negikele ir Yesu, negipedho lepgi e dieng'e nyathi kanyina kendo negiketo Yesu kuome. ³⁶Kane owuotho odhi, ji nopedho lepgi e yo.

³⁷Kane ochopo machiegni gi kama yo lorgo piny dhi Got Zeituni, oganda mangima mar jopuonjre nochako pako Nyasaye gi ilo kod duonde man malo kuom honni duto mane giseneno niya:

³⁸"Ogwedh Ruoth mabiro e nying Ruoth Nyasaye! Kuwe obedi e polo. kendo duong obedi malo chutho."

³⁹Jofarisai moko ei oganda nowacho ni Yesu ni, " Japuonj, kwer jopuonjreni."

⁴⁰Nodwoko niya, " Awachonu ni; kata ka di giling', to kitegi biro goyo koko."

⁴¹To kane osudo machiegni gi Jerusalem kendo noneno dalano maduong' noywage, ⁴²to nowacho niya, " Ka da in iwuon bed mana ni ing'eyo tinendeni gima nyalo kelo ni kuwe-to koro ogeng'ore ne wang'i. ⁴³Ndalo biro bironi ma wasiki biro chielo ohinga mogeng'oi kendo moluoroi, kendo okun-yoni bur koni gi koni ⁴⁴Ginigoyi piny, in gi nyithindi ei ohingani ok giniwe kidi moro e wi wadgi, nikech ne ok ing'eyo kinde ma Nyasaye biroe iri."

Yesu E Hekalu

⁴⁵Eka nodonjo e hekalu kendo nochako riembo oko jogo mane loko ohala.

⁴⁶Nowachonigi niya, " Ondiki ni, "Oda nobed od lamo; to un to useloke od jomecho.

⁴⁷Ndalo ka ndalo nopuonjo e hekalu. To jodolo madongo, jopuonj chik kod jotelu mag ji netemo mondo ginege. ⁴⁸To ne ok ginyal yudo yo mar timo kamano, nikech ji duto norwako wachne.

Openj Teko Mar Yesu

20 Chieng' moro achiel kane opuonjo ji ei agoch hekalu, kendo noyalo injili, jodolo madongo gi jopuonj chik, kaachiell kod jodongo nobiro ire. ²Negiwachone niya, "Nyiswae, en teko

mane ma itimogo gigi. Ng'ano momiyoi teko ni?"

³Nodwoko niya, "An bende abiro penjo penjo. Nyisauru, ⁴batiso mar Johana – ne oa e polo koso noa kuom ji?"

⁵Negiwuoyo e kindgi giwegi kendo wacho niya, "Ka wawacho ni, 'Noa e polo, obiro penjo ni, 'Ang'o momiyoi ok ne uyi-eye?" ⁶To ka wacho ni, 'Oa kuom ji, ji duto biro chielowa gi kite, nikech negiyie ni Johana ne en janabi."

⁷Omiyo negi dwoko niya, "Ok wang'eyo kuma ne oaye."

⁸Yesu nowacho niya, "Kata an ok abi nyisou ni giteko mane ma atimogo gigi."

Ngech Jopur

⁹Nodhiyo nyime kogoyo nigi ngero ni, "Ng'ato nopidho puoth mzabibu, noweye ne jopur moko kendo nodhiyo kumoro kuom ndalo mang'eny ¹⁰E kinde mar keyo nooro jatich ir jopur mondo gimiyie olemo moko mar puoth mzabibu. To jopur nogoye kendo noriembe gi lwete nono. ¹¹Nochako ooro jatich machielo, to jali bende negigoyo kendo timone tim wichkuot, kagiriembe gi lwete nono. ¹²Nooro kendo ng'at mar adek, to negihinye magimiyoi obedo gi adhonde kendo giriembe oko.

¹³Eka wuon puoth mzabibu nowacho niya, 'Abiro timo ang'o? Abiro oro wuoda mahero, kamoro dipo ginyalo winje!'

¹⁴To ka jopur nonene, ne giwacho wach ni 'Jali e wuod wuon lowo, kendo negiwacho, 'wanegeuru, to mwandu mar girkeni nodong'nwa! ¹⁵Omiyo negidhire gigole oko mar puoth mzabibu kendo neginege.

"Ang'o ma wuon puoth mzabibu notim negi?" ¹⁶Obiro biro mondo oneg jopurgo kendo chiwo puoth mzabibuno ni jomoko."

Kaji nowinjo mani, ne giwacho niya, "Gima kama kik timre!"

¹⁷Yesu nong'iyogi kochomo wang'e kuomgi kendo nopenjo niya, "Kara ere tiend gino mondiki:

"Kidi mane jogedo okwedo osedoko rariw mar ot.

¹⁸Ng'ato ka ng'ato mopodho kuom kidino notur matindo tindo, to jalo ma ogore kuome noregre ka buru."

¹⁹Jopuonj chik kod jodolo madongo ne manyo yo mondo gimake mapiyo, nikech neging'eyo nosegoyo ngeroni kuomgi. To negiluoro ji.

Golo Osuru Ni Kaisari.

²⁰Ka giritogo maok giweyone thuolo, negioro jombetre, mane wuondore ni gin joadiera maonge wach marach. Negigeno ni digi mak Yesu e gimoro mowacho mondo omi gimake gitere e loch kod teko mar ruoth. ²¹Omiyo jombetregu nopenje niya, "Japuonj wange'yo ni iwacho kendo ipuonjo yo mar Nyasaye koluware kod adiera. ²²En kare mondo wagal osuru ni Kaisari koso ok kare?"

²³Nonono obadho mane gichikone to nowachonigi niya, ²⁴"Nyisauru siling' kidoni kod nying' man kuome gin mag ng'a?"

²⁵Negiduoko ni, "mag Kaisari."

Nowachonigi ni, "Kara, chiwuru ni Kaisari gi kaisari, to ni Nyasaye gi Nyasaye."

²⁶Ne ok ginyal make kuom gima nosewacho kanyo e nyim ji kendo ka giwuoro duokone, negiling' thi.

Chier Kod Kend

²⁷Jo– Sadukai moko, ma wacho ni chier onge, nobiro ir Yesu kod penj ²⁸Negiwacho niya, "Japuonj, Musa nondikonwa ni ka owadgi ng'ato otho kendo oweyo chiege ma onge nyithindo, owadgi nyaka kend chi lielno mondo onywoigo nyithindo, ni owadgi. ²⁹Koro ne nitie owete abiriyo. Wuowi makayo nokendo dhako, to notho ka ok onywolo nyathi. ³⁰Wuowi mar ariyo ³¹kendo bang'e wuowi mar adek ne jokende, to machalre kamano wuowi mar abiriyo notho, maok ginywolo nyithindo.

³²Gikone, dhakoni bende notho. ³³Koro, chieng' chier obiro bedo chi ng'a, nimar jiabiriyogo nokende?

³⁴Yesu noduoko niya. "Ji me piny e kindeni kendo kendo ikendo. ³⁵To jogo mowal ni owinjore mondo obedie e piny mar tieng mabiro kendo e chier aa e tho ok bi kendo kata ok nokendi ngang', ³⁶to bende ok ginitho kendo ngang'; nimar gichalo gi malaika. Gin nyithind Nyasaye, nikech gin nyithind chier. ³⁷To kuom bungu maliel, Musa nyisyo bende ni jomotho chier, nimar noluongo Ruoth Nyasaye, ni, Nyasach Abraham, kendo Nyasach Isaka kod Nyasach Jakobo. ³⁸Ok en Nyasach jomotho, to mar jomangima, nikech kuome ji duto ngima."

³⁹Jopuonj chik moko nodwoko ni, "Iwachao maber, japuonj." ⁴⁰To onge ng'ato madihedhre penje penj moro kendo.

Kristo Wuod Ng'a?

⁴¹Eka Yesu nowachonigi niya, "Ere kaka giwacho ni Kristo en Wuod Daudi?"

⁴²Daudi owuon wacho maler e kitap Zaburi niya

"Ruoth Nyasaye nowacho ni Ruodha ni, " Bed e bada kora chwich, ⁴³Nyaka aket wasiki obed raten tiendeni."

⁴⁴Daudi luonge ni "Ruoth". Ere kaka onyalo bedo wuode.

⁴⁵Kane ji duto winjo, Yesu nowacho ni jopuonjrene niya, ⁴⁶"Beduru motang' ni jopuonj chik. Gihero wuotho gi lewni maboyo kendo gihero bedo gi kuonde bet madongo e sunagoke kod kinde ma imiy-oe ji duong' e sewni. ⁴⁷Giyako ut mond liete kendo kuom nyisruok gilamo lamo maroboche. Joma kamano ibiro kumo malit mologyo.

Chiwo Mar Chi Liel

21 Ka nong'iyi malo, Yesu noneno ka jo mwandu keto chiwo gi ei kar keno mar Hekalu. ²Noneno bende chi

liel moro ka keto pesa ariyo matindo ahinya. ³Nowacho niya, "Awachonu adiera, chi liel modhierni oseketo mologyo-oe ji duto mamoko. ⁴Ji dutogi nochiwo chiwogi ma gigolo kuom mwandugi, to en e dhierne oketo duto manyaka nokonyorego."

Ranyisi Mag Giko Mar Ndalo

⁵Jopuonjrene moko newuoyo kuom Hekalu kawuoro kaka olose gi kite mabe-ye to kod mich mochiw ni Nyasaye. To Yesu nowacho niya, ⁶"To kuom mano ma uneno kani, ndalo biro biro ma onge kidi kata achiel manodong' kochung' e wi wadgi, moro ka moro kuomgi nowit piny."

⁷Negipenje niya, "Japuonj, karang'o ma gigi biro timoree? To ang'o mabiro bedo ranyisi ni gichiegni timore?"

⁸Nodwoko ni, "Beduru motang' mondo kik wuondu. Nikech ji mang'eny nobi e nyinga kagiwacho ni, 'An e en. Kendo ni, 'Saa chiegni, kik uluwgi. ⁹Ka uwinjo humb lwenje gi koko, kik ubed maluor. Gigi nyaka timre mokwongo, to giko ok bi biro mana kanyono."

¹⁰Eka nowachonigi niya, "Oganda noked gi oganda machielo, kendo loch ruoth noked gi loch ruoth machielo.

¹¹Yiengni piny biro bedoe matek, kech kod tuoche nobedie kuonde mopogore opogore, kendo gik malich mabwogo ji gi honni madongo notimre maa e polo.

¹²"To kapok magi duto, gibiro makou kendo sandou. Ginitero e sunagoge kod jende, kendo nokelu e nyim ruodhi gi joloch, to mago duto notim nikech nyinga. ¹³Mano biro bedo thuolo mondo ubed nigijoneno.

¹⁴To beduru gi paro maok yiengini mondo kik uparru motelo ni ere kaka ubiro dwoko wach. ¹⁵Nimar abiro miyou weche gi riekio maonge wasiku kata achiel manyalo tamo kata kwero.

¹⁶Ibiri ndhogu kata mana gi jonyuolu kod owetu, wedeu gi osiepeu, kendo gibiro chiwo jomoko kuomu e tho. ¹⁷Ji duto biro sin kodu nikech an. ¹⁸To kata

man yie wiu achiel onge ma nolal. ¹⁹Ka uchungo motegno to ubiro reso ngimau.

²⁰Ka uneno Jerusalem oluor kod ogend lweny, ubiro nge'yo ni kindene mar kethruok chiegni. ²¹Koro eka joma ni Judea nyaka ring dhi e gode, kendo joma nie dala maduong' nyaka wuog oko, to jogo man oko ei piny kik donjie dala maduong'. ²²Nimar ma e kinde ma kum bedoe mar gigo duto mane ondiki. ²³Mano kaka obiro bedo malit e ndalogo ni mon mayach gi mine madhodho! Chandruok malit maduong' biro bedoe e piny gi mirima kuom jogi. ²⁴Ibiri negogi gi ligangla kendo notergi kaka jomotue e pinje duto. Jerusalem ibiro nyono piny gi Ogendini nyaka chop kinde mar Ogendini orom.

²⁵Ranyisi biro bedo e chieng' gi dwe kod sulweche. E piny, ogendini nobed kodhier kendo kong'eng, nikech nam mawu kendo apaka magore. ²⁶Ji biro podho nikech gik malich matimore, gi luoro mar gima biro e piny, nimar gik manie polo biro yiengni. ²⁷To gie kinde-no gibiro neno Wuod Dhano kabiro oa e boche polo kod teko gi duong' malich. ²⁸Ka gigi chako timore, chunguru kendo ting'uru wiuw malo, nikech resruoku sudo machiegni."

²⁹Nogoyo niggi ngeroni ni: Neuru yadh ng'owu kod yien duto; ³⁰Ka gichako lodho itegi, unyalo neno uwegi kendo ng'eyo ni ndalo koth chiegni. ³¹Kamano bende, ka uneno gigi timore, ung'eyo ni loch mar Nyasaye ni machiegni.

³²Awachonu adiera ni, tieng'ni ok nokadh adiera ngang' nyaka gigi duto timre. ³³Polo gi Piny nokadhi, to wechena ok nolal ngang'.

³⁴Beduru motang' nono chunyu biro bedo monyosore gi pek, mer kod parruok mar ngima to ndalo no nochopnu apoyo kaka obadho. ³⁵Nimar obiro biro ni ji duto modak e wang' piny mangima. ³⁶Beduru kurito kinde duto, kendo lemuru mondo unyal tony ni gigo duto mabiro timore, kendo mondo unyal chungo e nyim

Wuod Dhano."

³⁷Odiechieng' ka odiechieng' Yesu nepuonjo e hekalu, kendo odhiambo kodhiambo nodhiyo oko monindo otieno e Got miluongo ni Zeituni. ³⁸To ji duto nobiro e hekalu chon gokinyi mondo giwinje.

Judas Oyie Mondo Ondhog Yesu

22 Koro Sawo mar makati maok ketie Thowi, miluongo ni Pasaka, ne chiegni, ²to jodolo madongo gi jopuonj mag chik ne manyo yo moro ma digineggo Yesu, ling'ling', nikech negiluoro ji. ³Eka Satan nodonjo kuom Judas, miluongo ni Iskariot, achiel kuom Jiapar gariyo. ⁴To Judas nodhiyo ir jodolo madongo kod jotend jorit hekalu kendo noloso kodgi kaka onyalo ndhogo Yesu. ⁵Negimor kendo negiyie miye pesa. ⁶Ne oyie, kendo nong'iyio korito thwolo mochiwgo niggi Yesu ka oganda onge.

Sap Ruoth

⁷Eka nochopo chieng' Makati ma ok ketie Thowi, ma nyarombo mar Pasaka onego negie. ⁸Yesu nooro Petro gi Johana, kowacho niya, "Dhiuru mondo ulosnwa Pasaka mondo wabi wacham."

⁹Negipenje ni, "Kanye ma idwaro ni mondo walosee."

¹⁰Nodwoko niya, "Ka udonjo e dala maduong', ng'ato moting'o pi e dapi norom kodu. Luweuru nyaka kama odonjoe, ¹¹to uwachne wuon ot niya, 'Japuonj penjo ni Ere od welo, monego achamie Sap Pasaka kod jopuonjrena?' ¹²Obiro nyisou ot malach man malo e gorofa, moseiki. Kanye ema ulosie ikruok duto."

¹³Negidhiyo kendo negiyudo gik moko mana kaka Yesu nende osenyisogi. Omiyo negiiko Sap Pasaka.

¹⁴Kane saa ochopo, Yesu kod joote ne nobet e mesa. ¹⁵To nowachonigi niya, "Asedwaro ahinya mondo acham Sap Pasakani kodu kapok osanda. ¹⁶Nimar awachonu, ok anachame kendo ngang', nyaka chop time e pinyruodh Nyasaye."

¹⁷Bang' kosekawo kikombe, nogoyo erokamano kendo wacho niya, "Kawuru ma kendo upgeru uwegi. ¹⁸Nimar awachonu, ok anamadh divaini kendo nyaka chop piny Ruodh Nyasaye."

¹⁹Kendo nokawo makati, nogoyo erokamano kendo nong'inge, nomiyo gi kowacho niya, "Ma e ringra mochiw nikech un, timuru ma ka uparogo."

²⁰Kamano bende, bang' chiemo noka-wo kikombe mowacho niya, "Kikombe ni en e singruok manyien, ene remba, mochuer nikech un. ²¹To lwet ng'at ma biro ndhoga ni koda e mesa. ²²Wuod Dhano biro dhi mana kaka ne osechiki, to okwong' ng'atno mandhoge." ²³To negichako penjoree gin giwegi ni en ng'ano kuomgi manyalo biro timo ma.

²⁴Bende mbaka, nowuok e kindgi ni en ng'ano kuomgi mikwano ni duong' molojo. ²⁵Yesu nowachonigi ni, "Ruodhi mag Ogendini niggi teko kuom ogendini kendo jogi man-gi loch kuomgi luongore giwegi ni johawi. ²⁶To un ok onego ubed machal kodgi. Kar bedo kamano, jal maduong' molojo e dieru onego obed kaka jal matinie molojo, to jal motelo obed machal gi jalo matiyo. ²⁷Ni mar en ng'ano maduong', jalo mobedo e mesa koso jalo machiwo chiemo? Ok en jalo manie mesa koso? To an anie dieru kaka jalo matiyo. ²⁸Un e jogo mozesiko kochungo koda e masichena. ²⁹Achiwonu loch, mana kaka Wuora nochiwona achiel moro. ³⁰Kamano mondo uchiem kendo umethi e mesana e pinyruodha kendo ubedi e kombe mag loch, kung'ado bura ni ogendini apar gariyo mag Israel.

³¹"Simon, Simon, Satan osekwayo thuolo mondo opiedhi kaka cham mipiedho. ³²To aselamoni, Simon, ni mondo yienu kik olal. To ka iselokori ma idwogo, ijiw joweteni.

³³To nodwoke niya, " Ruoth, aikora dhiyo kodi e jela kendo e tho."

³⁴Yesu nodwoko niya, " Awachoni, Petro, kapoki Thuon gweno okok kawuono, ibiro kweda didek ni ok

ing'eya."

³⁵Eka Yesu nopenjogi ni, "Kane aorou maonge ofuko mar pesa, kata sanduk lewni kod wuoche, ne uchando gimoro koso?"

Negidwoko ni, "Onge."

³⁶Nowachonigi niya, "To koroni ka uonge gi ofuko mar pesa kaweuru, kendo sanduk bende, to ka uonge ligangla us koti mondo ing'iewgo lingangla.

³⁷Osendiki ni; To jal mane okwan kod joketho; kendo awachonu ni ma nyaka chop timre kuoma. Ee, gino mondik kuoma koro chiegni timore."

³⁸Jopuonjre nowacho niya, "Ne, Ruoth, ligengni ariyo eki ni ka."

Nodwokoni, "Mano oromo."

Yesu Lemo E Wi Got Zeituni

³⁹Yesu nowuok modhiyo e Got Zeituni kaka otimo pile, kendo jopuonjre noluwe. ⁴⁰Ka nochopo kanyono, nowachonigi niya, "Lamuru mondo kik udonj e temruok" ⁴¹Noweyogi modhiyo mochwalore mabor madirom diro kidi, mine ogoyo chonge piny kendo nolamo niya, ⁴²Wuora, ka iyie, gol kikombeni oa kuoma, to ok dwarena, to mari ema otimre." ⁴³Malaika noa e polo nofwenyorene kendo nomiye teko. ⁴⁴To kaka ne en gi chuny malit kochandore, nolemo ma tek ahinya, kendo luya ne chotne katon piny mana ka remo.

⁴⁵Kane ochungo oa e lamo kendo nodhiyo ir jopuonjre, noyudogi kaginindo, giol nikech chunyi nelit. ⁴⁶Nopenjogi ni, "Ango momiyo unindo? Auru malo kendo ulam mondo kik udonj e temruok."

Yesu Omaki

⁴⁷Kane pod owuoyo oganda nobiro, to ng'atno mane iluongo ni Judas, achiel kuom Ji apar gariyo, notelonigi, nosudu ir Yesu mondo onyodhe, ⁴⁸To Yesu nopenje ni, Judas, indhogo Wuod Dhano gi nyoth?

⁴⁹Kane jolup Yesu noneno gima nedhi timore, negiwacho ni, "Ruoth, owinjore

waked gi ligengniwa koso? ⁵⁰To achiel kuomgi nobeto jatich mar jadolo maduong' mong'ado ite korachwich mol-war piny.

⁵¹To Yesu nodwoko niya. "Ok kamano ngang!" Eka nomulo it nga'tno kendo nochange.

⁵²Eka Yesu nowacho ni jadolo maduong', jotelo mag jorit hekalu, kod jodongo, mane obiro ire, niya, "An jatend koko mar jendeke, momiyu ubiro ira gi ligengni kod arunge? ⁵³Pile ka pile an kodu e agolni mag hekalu, to ne ok uketo lwedo kuoma. To mani en sau - sama mudho olocho."

Petro Okwedo Yesu

⁵⁴Eka kane gimake, negidhiyo kode ka gitere ei od jadolo maduong'. Petro noluwogi kuma bor. ⁵⁵To kane gisemoko mach e chuny laro kendo negisebedo piny kaachiel, Petro nobedo kodgi. ⁵⁶Nyako ma jatich nonene kobedo kanyo kama mach lielie. Nong'iyie machiegni kode kendo nowacho ni, "Ng'atni ne ni kode."

⁵⁷To nokwerogo, kowacho ni, "Dhako ok ang'eye!

⁵⁸Achien bang'e matin, ng'at moro nonene kendo nowacho ni, "In bende in achiel kuomgi."

Petro nodwoko niya, "Omera, ok an."

⁵⁹Achien bang'e madirom saa achiel, ng'at machielo nojiwo kowacho matek ni, "Adier chutho jali ne ni kode, nimar en Ja- Galili."

⁶⁰Petro nodwoko ni, " Omera, ok ang'eyo gima iwuoyo kuome! "Mana kaka nowuoyono, thvon gweno nokok. ⁶¹Ruoth nolokore kendo nong'iyu Petro tir. Noparo wachno ma Ruoth nosewachone ni, "Kapok thvon gweno nokok tinendeni, ibiro kweda nyadidek." ⁶²To nowuok odhiyo oko kendo noywak malit.

Askeche Marito Ojaro Yesu

⁶³Jogo manerito Yesu nochako jare kendo goye. ⁶⁴Negitweyo wang'e kendo negiwachone gi thvon ni, "Korie! Ng'ano

mogoyoi?" ⁶⁵To negiwachone gik moko maricho ma wang'o ich.

Yesu E Nyim Pilato Gi Herode.

⁶⁶Kar yawruok piny, bura mar jodong ji kaachiel gi jodong jodolo gi jopuonj mag chik, nochokore kaachiel, kendo Yesu nokel irgi. ⁶⁷Negiwacho niya, "Ka in e Kristo, to nyiswae."

Yesu nodwoko ni, " Ka awachonu, ok ubi yieya." ⁶⁸to ka apenjou, bende ok ubi dwoko. ⁶⁹To chakre kawuono kadhiyo nyime, Wuod Dhano biro bet e bat korachwich mar Nyasaye Manyalo Gik Moko Duto!"

⁷⁰Gi duto negipenjo ni, "Kara in e Wuod Nyasaye?"

Nodwoko ni, "Un kare kowacho ni An e en!"

⁷¹Eka negiwacho ni, "Ang'o momiyu pod wadwaro neno moko kendo? Wasewinjo mano koa e dhoge owuon."

23 Eka chokruok mangima duto nochungo kendo negitere ir Pilato. ²Eka negichako donjone kagiwacho ni, "Waseyudo ng'atni kokelo tulo e pinywa. Okwedo golo osuru ni Kaisar kendo owacho owuon ni en Kristo, ma Ruoth.

³Omiyo Pilato nopenjo Yesu niya, "In ruodh Joyahudi koso?"

Yesu nodwoko ni, "Ee, en kaka iwachcho."

⁴Eka Pilato nowachoni jodongo, jodolo gi oganda ni, "Ok aseyo gima oketho madidonjne go."

⁵To negimedo wach kagiramo ni, "Omiyo ji tungni kuonde duto e Judea koluware gi puonjne. Nochako e Galili to osebiro mochopo ka."

⁶Ka nowinjo mano, Pilato nopenjo ka ng'atni ne en ja - Galili. ⁷Kane oyudo ni Yesu nie bwo loch mar Herode, noore ir Herode, ma bende neni Jerusalem e kindeno.

⁸Herode kane oneno Yesu, nodoko mamor ahinya, nikech kuom kinde mabor nose- dwaro mondo onene. Kuom gik

mane owinjo kuome, nogeno nene kotimo honni moko. ⁹Nopenje penjo mang'eny, to Yesu ok nodwoko. ¹⁰Jodolo madongo gi jopuonj mag chik nochungo kanyono, kagidonjone mager ahinya. ¹¹Eka Herode gi asekechene nojare kendo nyiere. Negirwake gi kandhu marakido maber, negidwoke ir Pilato. ¹²Chieng' onogono, Herode gi Pilato ne obedo osiepe- motelo ne odiechiengni ne gin wasigu.

¹³Pilato noluongo jodolo madongo kaachiel, jotelo kod ji duto, ¹⁴to nowachonigi ni, " Ne ukelo ng'atni ira kaka jal mamiyo ji goyo koko ka gidagi, winjo chik. Asenone e nyimu to ok aseyo gima dimi odonjone. ¹⁵Kata mana Herode bende ok oyude gi ketho, nimar nodwoke irwa; unyalo neno, ni ok osetimo gimoro mowinjore kod tho. ¹⁶Emomiyo abiro mana kume to bang'e aweye odhi." ¹⁷Koro nochune ni nyaka ogonyonigi ng'ato achiel motue higa ka higa chieng' Sawo mar Pasaka.

¹⁸Negigoyo koko gi duol achiel ka gi-wachoni, " Neg ng'atni! To gonyonwa Baraba!" ¹⁹(Baraba noket e jela nikech wach koko mane otimore e dala maduonj, kendo nikech nek.)

²⁰Pilato kaka nedwaro gonyo Yesu, omiyo nochako owuoyo kosayogi kendo ²¹To negidhiyo nyime kagikok ni, " Gure! Gure!"

²²Eka nowuoyo kodgi mar adek kowachoni, " Nang'o? Ere gima rach ma ng'atni osetimo? Onge gima aseyo kuome moromo gi kum mar tho. Omiyo abiro kume kendo bang'e agonye odhi."

²³To gi koko maduonj negiramo kagidwaro ni nyaka gure, to loko margi nobedo mapek. ²⁴Kuom mano Pilato nong'ado bura mondo dwardogi otimnegi. ²⁵Nogonyo ng'atno mane oketi e jela nikech koko gi nek, jalno no mane gikwayo, to Yesu noketo e dwardogi.

Gur E Msalaba

²⁶Eka kane gigole oko, ne gimako Simon manoa Kurene, mane obiro ka oa e

gweng' moro, kendo negiyeyo msalaba kuome mondo oting'e koluwo bang' Yesu. ²⁷Ji, kwan mang'eny noluwe, moting'o mon bende mane ywak ka goyo nduru nikech en. ²⁸Yesu nolokore mowachonigi ni, "Nyi Jerusalem, kik uywagna, ywaguru ne un uwegi kendo nikech nyithindu. ²⁹Nikech kinde biro ma ubiro wacho ni, " Gin johawi mon maok onywol, ije maok nonywol, kendo thunde maok nodhodhi! ³⁰Eka

"giniwach ni gode ni, "Kendo ni!"
gode matindo bende ni,
"Umwauru!"

³¹Nimar ka ji timo gigi ka yath numu, ang'o mabiro timore ka otuo?

³²Ji ariyo moko, ma joketho, bende negigolo oko kode mondo ogurgi. ³³Kane gichopo kama iluongo ni Hanga Wich, ne gigure kanyono, kaachiel gi joketho kaachiel e bade korachwich, to machielo e bade koracham. ³⁴Yesu nowacho ni, "Wuora, wenigi, nikech gikia gima gitimo." To ne gipogo lepe gi goyo ombulu.

³⁵Ji nochungo kendo ng'icho, to jodongo bende nenyiere. Negiwacho niya, "En maneoreso jomoko, kare oresree owuon ka en e Kristo mar Nyasaye, Jalno Moyier."

³⁶Askeche bende nobiro mojare. Negimiye kong awayo ³⁷kendo wacho ni, " Ka in e ruodh Jo- Yahudi, to kara resri iwuon."

³⁸Ne nitie ndiko mondik e wiye malo, misomo ni, JALI E RUODH JO- YAHU-DI.

³⁹Achiel kuom joketho mane ogur moliero kanyo nogone siboi kowachoni, " Ok in e Kristo? Resri iwuon koda wan!"

⁴⁰To ng'at ma jaketho machielo nokwere ni, "Ok iluoro Nyasaye, nomedo wachoni, nimar in e bwo kum achielno? ⁴¹Wan okumwa kare, nimar wayudo gima owinjore gitimbewa. To jali onge gimarach mosetimo."

⁴²Eka nowacho ni, "Yesu, para chieng' mibire e loch ni."

⁴³Yesu nodwoke ni, "Awachoni adiera,

tinendeni ibiro bedo koda e Paradis."

Tho Yesu

⁴⁴Koro ne en machiegni saa auchiel mar odiechieng' mudho nobiro moimo piny duto nyaka saa ochiko. ⁴⁵nikech chieng' ne ok rieny. To nanga mar hekalu noriedore diere tir ariyo. ⁴⁶Eka Yesu noluongo gi duol maduong' ni, "Wuora, aketo chunya e lweteni." Kane osewacho mani, noyweyo muche mogik.

⁴⁷Jaduong' lweny koneno gima notimore, nomiyo opako Nyasaye kendo wacho ni, "Adier chutho, jali ne en ng'at makare!" ⁴⁸Kane ji duto mane ochokore kanyo mondo obed joneno mar wachno noneno gima notimore, negigoyo korgi kendo negidok miechgi. ⁴⁹To jogo duto mane ong'eye, moriwo koda mon mane oluwe koa Galili, nochungo mochwalore kagineno gigi.

Ik Mar Yesu

⁵⁰Koro ne nitie ng'ato ma nyinge Josef, ng'at maber kendo makare, ⁵¹jal mane ok oyie kod dwaro gi timbegi. Noa e taon mar Judea mar Arimathaya kendo norito pinyruoth Nyasaye. ⁵²Nodhiyo ir Pilato, mokwayo ringre Yesu. ⁵³Eka noloro ringre piny, noboye gi nanga mareprep maber kendo nokete e bur ei lwanda, mano ma mane pok oyikie ng'ato ⁵⁴Ne en Chieng' Ikruko, to Sabato ne chiegni chakore.

⁵⁵Mon mane obiro kod Yesu koa Galili noluwo Josef kendo negineno burno bende ka ringre ne oketi e iye. ⁵⁶Eka negidok dala kendo negiloso yath madum mamit gi mo mang'ue ng'ar. To ne giyueyo Chieng' Sabato kaluwore kod luoro chik.

Chier Mar Yesu

24 Chieng' mokwongo mar juma, okinyi mang'ich, mon-go noting'o gik mang'ue ng'ar mane giseloso, ma gidhiyo e liel. ²Negiyudo ka kidi mane odin-go dho bur koseng'iel oko, ³to kane

gidonjo e iye, ne ok giyudo ringre Ruoth Yesu. ⁴Kane pod giwuoro wachni, apoyo nono ji ariyo morwakore gi lewni mang'ang'ni ka mil polo nochungo but gi. ⁵Mon-go nobwok kendo negikulore ka wigi ochomo piny, to nowachonigi ni, "Ang'o momiyo umanyo ng'at mangima e kind joma otho?" ⁶Oonge ka ; osehier! Paruru gima ne owachonu, kane pod en kodu e Galili: ⁷Wuod Dhano nyaka ket e lwete joricho, kendo nogure to chieng' mar adek nochiere kendo. ⁸Eka negiparo wechene.

⁹Kane giduogo gjaa e liel, neginyiso Jipapar gachiel kod ji duto mamoko gigi duto. ¹⁰Ne gin Mariam nyar Magdala, gi Joana kod Maria min Jakobo, gi mon moko mane ni kodgi, ema nonyiso joote wachni. ¹¹To ne ok gi yie weche mon-go, nikech wechegi ne nenore koyuma. ¹²Petro, kata kamano, noa malo kendo noringo odhi e liel. Kokulore e liel, nonono lewni kopiore kanyo kendgi, noa modok, kowuoro owuon gima osetimore.

E Yo Madhiyo Emau.

¹³Koro e odiechieng' nogono ji ariyo kuomgi ne dhiyo e dala miluongo ni Emau, kama dirom kilomita apar gang'wen Jerusalem. ¹⁴Negiwuoyo kendgi kuom gik moko duto mosetimore. ¹⁵Ka negiwuoyo kendo goyo mbaka kuom gigi e kindgi giwegi, Yesu owuon nobiro kendo nowuotho kodgi; ¹⁶to ne ok ginyal ng'eye.

¹⁷Nopenjogi ni, "Ang'o ma uwuoyoe kendu ka – uwuotho ni?"

Ne gichung' kar tiendgi, ka gi jowo wang'gi gikuyo. ¹⁸Achiel kuom gi, ma nyinge Kleopa, nopenje ni, "In mana wendo e Jerusalem ka kendo ok ing'eyo gigi mosetimore kuno e ndalogi koso?"

¹⁹Nopenjo ni, "Gik mage?"

Negidwoko ni, "Kuom Yesu ma ja-Nazareth. Ne en janabi, maratego e wach gi tim e nyim Nyasaye kod ji duto. ²⁰Jodolo madongo gi Jodongwa nochiwo

mondo ong'adne buch tho, kendo negigire; ²¹to ne wan gi geno ni en e jal mane biro reso Israel. To molyo bende, tinde en ndalo adek nyaka ma notimoree. ²²Momedore ni mano, mon moko man kodwa nende obwogowa gi wach. Negidhiyo e liel okinyi mang'ich ²³to ok negiyudo ringre. Negiduogo kendo nyisowa ni negineno malaike moko manofwenyore nig, manowacho ni ongi-ma. ²⁴Eka jowa moko nodhiyo e liel to negiyudo mana kaka mon-go ne owacho, to en ok ne ginene."

²⁵Nowachonigi niya, "Ufuwo nadi to mano kaka chunyu kawo kinde mondo uyie duto mane jonabi osehachol! ²⁶Donge ne Kristo nyaka yud masiche gi to eka bang'e nodonji e duong?" ²⁷To chakre kod Musa gi Jonabi duto, noleronigi konyisogi gino mane owachi kuome e ndiko duto.

²⁸Kaka negisudo machiegni gi dala mane gidhiyoe, Yesu notimore kagima pod odwaro dhiyo nyime. ²⁹To ne gigeng'e matek kagiwacho ni, "Bed kodwa, nimar koro odhiambo chiegni, odiechieng' koro dhi rumo." Omiyo nodhiyo mondo obed kodgi.

³⁰Kane en kodgi e mesa, nokawo makati, nogoyo erokamano, nong'ige kendo nochako miyogi. ³¹Eka wengegi nowawore kendo neging'eye, to nolal mowuok oa e wang'gi. ³²Negipenjore ng'ato gi ng'ato ni, "Donge ne chunywa mor kane owuoyo kodwa e yo kendo konyisowa tiend Ndiko?"

³³Negia malo kendo negidok piyo Jerusalem. Kuro negiyudo Ji- apar gachiel go gi jogo mane ni kodgi, ka gichokore kaachiel. ³⁴kagiwacho ni, "En adier! Ruoth osechier kendo osefwenyore ni Simon." ³⁵Eka jiaroyogo nowacho, gino mane otimore e yo, kendo kaka neging'eyo Yesu ka nong'igo makati.

Yesu Ofwenyore Ni Jopuonjre

³⁶Kane pod giwuoyoe e wachni, Yesu owuon nochungo e diergi kendo wachonigi ni, "Kuwe obed kodu."

³⁷Negi bwok kendo negiluor, kagiparo ni gineno jachien. ³⁸Nowachonigi ni, "Ang'o momiyo uchandoru, kendo ang'o momiyo chich nie e parou? ³⁹Neuru lwetena gitiendena. En an awuon! Mulauru kendo neuru; jachien onge ringruok kata choke, kaka uneno ang'o."

⁴⁰Kane osewacho ma, nonyisogi lwetene gi tiendene, ⁴¹To kane pod ok negiyie nikech mor kod wuoro, nopenjogi ni, "Bende un gi gimoro amora ka eri madicham?" ⁴²Negimiye rech matin moro motedi ⁴³nokawe kendo nochame e nyim gi.

⁴⁴Nowachonigi ni, "Mano e gino mane awachonu kane pod an kodu: Giko moko manondiki kuoma e Chik Musa gi Jonabi kod Zaburi, nyaka timre."

⁴⁵Eka noyawo parogi mondo giwinj Ndiko. ⁴⁶Nowachonigi ni, "Mani e gima ondiki: Kristo nyaka ne masira kendo chieng' mar adek enochier oa kuom joma otho. ⁴⁷kendo lokruok gi weyo ni ji richoggi ibiro yalo e nyinge ni ogendini duto, chakre Jerusalem. ⁴⁸Un joneno mag gigi, ⁴⁹Abiro oronu gima Wuora osesingo, to beduru ei dala ka nyaka oserwaku gi teko moa malo."

Dhiyo E Polo

⁵⁰Kane osetelonigi mogologi oko magidhiyo machiegni gi Bethania, noting'o lwetene kendo nogwedhogi. ⁵¹Kane ogwedhogi, noweyogi to nokawe oting'e otere e polo. ⁵²Eka negilame kendo negidok Jerusalem kod mor maduong'. ⁵³To ne gimedo bedo kinde duto ei hekalu, kagipako Nyasaye.